



周書本紀八列傳四十二合五十篇唐令狐德棻請撰
次而詔德棻與陳叔達庾儉成之

仁宗時出太清樓本合史館祕閣本又募天下獻書而
取夏竦李巽家本下館閣是正其文字今既鏤板以傳
學官而臣等始預其是正又序其目錄一篇曰周之六
帝當四海分裂之時形勢劫束毅然有志合天下於一
而材足以有爲者特文帝而已文帝召蘇綽於稠人之
中始知之未盡也卧予之言既當其意遂起并晝夜諮
諏酬酢知其果可以斷安危治亂之謀而謂已以聽之
考於書唯府兵之設欽于歲已散之民而係之於兵庶

幾得三代之遺意能不駭人視聽以就其卒而效見於後世文帝嘗患文章浮薄使綽爲大誥以勸而卒能變一時士大夫之制作然則勢在人上而欲鼓舞其下者奚患不成雖然非文帝之智內有以得於已而蘇綽之守外不誦於人則未可必其能然也以彼君臣之相遭非以先王之道而猶且懇懇以誘之言又况無所待之豪傑可易以畜哉夫以德力行仁所以爲王霸之異而至於誦已任人則未始不同然而君能畜臣者天下之至難傳曰取人以身脩身以道脩道以仁蓋道極於不可知之神而人有其質推之爲天下國家之用者以其

粗爾然非致其精於已則其粗亦不能以爲人惟能自愛其身則內不欺其心內不欺其心則外不蔽於物然後好惡無所作而尚何有已哉能無已始可以得已而足以揆天下之理知人之言而邪正無以度其實尚何患乎論之不一哉於是賢能任使之盡其方而無所省者以天下之耳目而小人不能託忠以誣君子又從而爲之勸禁則小人忿欲之心已黜於冥冥之際君子樂以其類進而摩厲其俗凜然有耻君臣相與謀於上因敝以新法度而令能者馳驚於下有忠信之守而無傳會遷就之意則法度有怫於民而下不以情赴上者乎

蓋虛然後能受天下之實約然後能操天下之煩垂纓
攝衽俯仰廟堂無爲以應萬幾者致其思而已矣夫思
之爲王者事君臣一也而君之勢則異焉世獨頌堯舜
之無爲而安知夫人主自宜無爲而思則不可一日已
也書曰思曰睿揚雄曰於道則勞其不然歟蓋夫法度
善矣非以道作其人則不能爲之守而民之多寡物之
豐殺法度有視時而革者必待人而後謀則是可不致
其思乎苟未能此而徒欲法度之革者是豈先王爲治
之序哉彼區區之庸何足以議徒取其能因一時君臣
之致好猶足以見其効又况慨然行先王之道而得大

有爲之勢乎是固不宜無論也臣竊臣安國臣希跡死
謹上

道光十四年歲在甲午七月十有一日在杭州學使陳少宗伯署中向書種堂林賈傳得北周書一部八本明史稿一部八十本同日燈下傳密記

後周書目錄

凡五十卷

紀八卷

傳四十二卷



周書卷一

文帝上 姓宇文氏諱泰

紀第一

周書卷二

文帝下

紀第二

周書卷三

孝閔帝 諱覺

紀第三

周書卷四

紀第四

明帝 諱毓

周書卷五

紀第五

武帝上 諱翳

周書卷六

紀第六

武帝下

周書卷七

紀第七

宣帝 諱贊

周書卷八

紀第八

靜帝 諱衍

周書卷九

列傳第一

皇后

周書卷十

列傳第二

邵惠公顥

子什肥導護 什肥子貞

杞簡公連

莒莊公洛生 子莒虞國公仲

周書卷十一

列傳第三

晉蕩公護 叱羅協 馮遷

周書卷十二

列傳第四

齊煬王憲 子貴質

周書卷十三

列傳第五

文閣明武宣諸子

周書卷十四

列傳第六

賀拔勝 弟岳 兄允 念賢

周書卷十五

列傳第七

寇洛 李弼 弟標 于謹 子寔

周書卷十六

列傳第八

趙貴 獨孤信 侯莫陳崇

周書卷十七

列傳第九

梁禦 若于惠 怡峯 劉亮 王德

周書卷十八

列傳第十

王熙 子慶遠 孫述 王思政

周書卷十九

列傳第十一

達奚武 子震 侯莫陳順 弟十八

豆盧寧 宇文貴 楊忠

周書卷二十

列傳第十二

王盟 賀蘭祥 尉遲綱

周書卷二十一

閻慶 弟十八

周書卷二十二

列傳第十三

尉遲迴 王謙 司馬消難 弟十五

周書卷二十三

列傳第十四

周惠達 馮景 楊寬 兄穆儉 柳慶 子機

周書卷二十三 列傳第十五

蘇綽

周書卷二十四 列傳第十六

盧辯

周書卷二十五 列傳第十七

李賢 弟遠

周書卷二十六 列傳第十八

長孫儉 弟登 長孫紹遠 兄子兕 斛斯徵

周書卷二十七 列傳第十九

赫連達 韓果 蔡祐 常善

辛威 庫狄昌 田弘 梁椿

梁臺 宇文測 弟深

周書卷二十八 列傳第二十

史寧 陸騰 賀若敦 權景宣

周書卷二十九 列傳第二十一

王傑 賈 王勇 宇文虬 宇文盛 弟丘

耿豪 高琳 李和 伊婁穆

楊紹 王雅 達奚寔 劉雄

周書卷三十 侯植

周書卷三十

列傳第二十二

竇熾 兄子毅

于翼 李穆

周書卷三十一

列傳第二十三

韋孝寬

梁士彥

周書卷三十二

列傳第二十四

申徽

陸通 弟逞

柳敏

盧柔

唐瑾

周書卷三十三

列傳第二十五

庫狄峙

楊荐

趙剛

王慶

趙昶

王悅

趙文表

周書卷三十四

列傳第二十六

趙善

元定

楊擢

裴寬

楊敷

周書卷三十五

列傳第二十七

鄭孝穆

崔謙 弟訖

子弘度

崔猷

裴俠

薛端

薛善 弟慎

周書卷三十六

列傳第二十八

鄭偉

楊纂

段永

王士良

崔彥穆

令狐整

司馬裔

裴果 子孝仁

附劉志

子明

子陵

周書卷三十七

列傳第二十九

寇雋

韓褒

趙肅

張軌

李彥

郭彥

裴文舉

高賓

周書卷三十八

列傳第三十

蘇亮

弟湛

柳虬

呂思禮

薛愷

薛寘

李昶

元偉

周書卷三十九

列傳第三十一

韋瑱

梁昕

皇甫璠

辛慶之

族子

王子直

杜杲

周書卷四十

列傳第三十二

尉遲運

王軌

宇文神舉

宇文孝伯

顏之儀

樂運

周書卷四十一

列傳第三十三

王褒

庾信

周書卷四十二

列傳第三十四

蕭撝

蕭世怡

蕭圓肅

蕭大園

宗懔

劉璠

柳霞

周書卷四十三

列傳第三十五

李延孫

韋祐

韓雄

陳忻

魏玄

周書卷四十四

列傳第三十六

泉企

李遷哲

楊乾運

扶猛

陽雄

席固

任果

周書卷四十五

列傳第三十七

儒林

盧誕

盧光

沈重

樊深

熊安生

樂遜

周書卷四十六

列傳第三十八

孝義

李棠

柳檜

杜叔毗

荆可

周書卷四十七

皇甫遐

張元

周書卷四十七

列傳第三十九

藝術

冀儁

蔣昇

姚僧垣

子最

黎景熙

趙文深

褚該

周書卷四十八

列傳第四十

蕭譽

周書卷四十九

列傳第四十一

異域上

高麗

百濟

蠻

獠

宕昌

鄧至

白蘭

氏

稽胡

具庫莫奚

周書卷五十八

列傳第四十二

異域下

周書卷五十八

吐谷渾

高昌

鄯善

焉耆

龜茲

于闐

嚙噠

粟特

安息

波斯

後周書目錄終

周書卷一

帝紀第一

令狐德棻等撰

皇明朝列大夫國子監祭酒臣蕭雲舉

承德郎右春坊右中允管司業事臣李騰芳等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

旨重修

文帝上

太祖文皇帝姓宇文氏諱泰字黑獺代武川人也其先

出自炎帝神農氏為黃帝所滅子孫遷居朔野有葛烏

菟者雄武多筭畧鮮卑慕之奉以為主遂總十二部落

世為大人其後曰普回因狩得玉璽三紐有文曰皇帝

重普回心異之以爲天授其俗謂天曰宇謂君曰文因號宇文國并以爲氏焉普回子莫那自陰山南徙始居遼西是曰獻侯爲魏舅生之國九世至侯豆歸爲慕容晃所滅其子陵仕燕拜駙馬都尉封玄菟公魏道武將攻中山陵從慕容寶禦之寶敗陵率甲騎五百歸魏拜都牧主賜爵安定侯天興初徙豪傑於代都陵隨例遷武川焉陵生系系生韜並以武畧稱韜生肱肱任俠有氣幹正光末沃野鎮人破六汗拔陵作亂遠近多應之其僞署王衛可孤徒黨最盛肱乃糾合鄉里斬可孤其衆乃散後避地中山遂陷於鮮于脩禮脩禮令肱還統

其部衆後爲定州軍所破歿於陣武成初追尊曰德皇帝太祖德皇帝之少子也母曰王氏孕五月夜夢抱子昇天纔不至而止寤而告德皇帝德皇帝喜曰雖不至天貴亦極矣生而有黑氣如蓋下覆其身及長身長八尺方額廣額美鬚髯髮長委地垂手過膝背有黑子宛轉若龍盤之形面有紫光人望而敬畏之少有大度不事家人生業輕財好施以交結賢士大夫少隨德皇帝在鮮于脩禮軍及葛榮殺脩禮太祖時年十八榮遂任以將帥太祖知其無成與諸兄謀欲逃避計未行會爾朱榮擒葛榮定河北太祖隨例遷晉陽榮以太祖兄弟

周書卷一
帝紀二
雄傑懼或異已遂託以他罪誅太祖第三兄洛生復欲
害太祖太祖自理家寃辭旨慷慨榮感而免之益加敬
待孝昌二年燕州亂太祖始以統軍從榮征之先是北
海王顥奔梁梁人立爲魏主令率兵入洛魏孝莊帝出
居河內以避之榮遣賀拔岳討顥仍迎孝莊帝太祖與
岳有舊乃以別將從岳及孝莊帝反正以功封寧都子
邑三百戶遷鎮遠將軍步兵校尉万俟醜奴作亂關右
孝莊帝遣爾朱天光及岳等討之太祖遂從岳入關先
鋒破僞行臺尉遲菩薩等及平醜奴定隴右太祖功居
多遷征西將軍金紫光祿大夫增邑三百戶加直閣將

軍行原州事時關隴寇亂百姓凋殘太祖撫以恩信民
皆悅服咸喜曰早值宇文使君吾等豈從逆亂太祖嘗
從數騎於野忽聞簫鼓之音以問從人皆云莫之聞也
晉泰二年爾朱天光東拒齊神武留弟顯壽鎮長安秦
州刺史侯莫陳悅爲天光所召將軍衆東下岳知天光
必敗欲留悅共圖顯壽而計無所出太祖謂岳曰今天
光尚邇悅未有二心若以此事告之恐其驚懼然悅雖
爲主將不能制物若先說其衆必人有留心進失爾朱
之期退恐人情變動乘此說悅事無不遂岳大喜卽令
太祖入悅軍說之悅遂不行乃相率襲長安令太祖輕

騎爲前鋒太祖策顯壽怯懦聞諸軍將至必當東走恐其遠遁乃倍道兼行顯壽果已東走追至華山擒之太昌元年岳爲關西大行臺以太祖爲左丞領岳府司馬加散騎常侍事無巨細皆委決焉齊神武旣破爾朱遂專朝政太祖請往觀之旣至并州齊神武問岳軍事太祖口對雄辯齊神武以爲非常人欲留之太祖詭陳忠款乃得反命遂星言就道齊神武果遣追之至關不及太祖還謂岳曰高歡非人臣也逆謀所以未發者憚公兄弟耳然凡欲立大功匡社稷未有不因地勢總英雄而能克成者也侯莫陳悅本實庸材遭逢際會遂叨任

委旣無憂國之心亦不爲高歡所忌但爲之備圖之不能今費也頭控弦之騎不下一萬夏州刺史解拔彌俄突勝兵之士三千餘人及靈州刺史曹泥並恃其僻遠常懷異望河西流民紇豆陵伊利等戶口富實未奉朝風今若移軍近隴扼其要害示之以威服之以德卽可收其士馬以實吾軍西輯氐羌北撫沙塞還軍長安匡輔魏室此桓文舉也岳大悅復遣太祖詣闕請事密陳其狀魏帝深納之加太祖武衛將軍還令報岳岳遂引軍西次平涼謀於其衆曰夏州隣接寇賊須加綏撫安得良刺史以鎮之衆皆曰宇文左丞卽其人也岳曰左

周書卷一 帝紀 四
丞吾之左右手也如何可廢沈吟累日乃從衆議於是表太祖爲使持節武衛將軍夏州刺史太祖至州伊犁望風欵附而曹泥猶通使於齊神武魏永熙三年春正月岳欲討曹泥遣都督趙貴至夏州與太祖計事太祖曰曹泥孤城阻遠未足爲憂侯莫陳悅怙衆密邇貪而無信必將爲患願早圖之岳不聽遂與悅俱討泥二月至於河曲岳果爲悅所害其士衆散還平涼唯大都督趙貴率部曲收岳屍還營於是三軍未有所屬諸將以都督寇洛年最長相與推洛以總兵事洛素無雄略威令不行乃謂諸將曰洛智能本闕不宜統御近者迫於

良

羣議推相攝領今請避位更擇賢材於是趙貴言於衆曰元帥忠公盡節暴於朝野勲業未就奄罹凶酷豈唯國喪良宰固亦衆無所依必欲糾合同盟復讐雪恥須擇賢者總統諸軍舉非其人則大事難集雖欲立忠建義其可得乎竊觀宇文夏州英姿不世雄謨冠時遠邇歸心士卒用命加以法令齊肅賞罰嚴明真足恃也今若告喪必來赴難因而奉之則大事集矣諸將皆稱善乃命赫連達馳至夏州告太祖曰侯莫陳悅不顧盟誓棄恩背德賊害忠良羣情憤惋控告無所公昔居管轄恩信著聞今無小無大咸願推奉衆之思公引日成歲

願勿稽留以慰衆望也太祖將赴之夏州吏民咸泣請
曰聞悅今在永洛去平涼不遠若已有賀拔公之衆則
圖之實難願且停留以觀其變太祖曰悅旣害元帥自
應乘勢直據平涼而反赳赳屯兵永洛吾知其無能爲
也且難得易失者時也不俟終口者幾也今不早赴將
恐衆心自離都督彌姐元進規欲應悅密圖太祖事發
斬之太祖乃率帳下輕騎馳赴平涼時齊神武遣長史
侯景招引岳衆太祖至安定遇之謂景曰賀拔公雖死
宇文泰尚存卿何爲也景失色對曰我猶箭耳隨人所
向安能自裁景於此卽還太祖至平涼哭岳甚慟將士

且悲且喜曰宇文公至無所憂矣於時魏孝武帝將圖
齊神武聞岳被害遣武衛將軍元毗宣旨慰勞追岳軍
還洛陽毗到平涼會諸將已推太祖侯莫陳悅亦被勅
追還悅旣附齊神武不肯應召太祖謂諸將曰侯莫陳
悅枉害忠良復不應詔命此國之大賊豈可容之乃命
諸軍戒嚴將以討悅及元毗還太祖表於魏帝曰臣前
以故關西大都督臣岳竭誠奉國橫罹非命三軍喪氣
朝野痛惜都督寇洛等銜冤茹感志雪讐恥以臣昔同
幕府苦賜要結臣便以今日十四日輕來赴軍當發之
時已有別表旣爲衆情所逼權掌兵事詔召岳軍入京

此乃爲國良策但高歡之衆已至河東侯莫陳悅猶在
永洛况此軍士多是關西之人皆戀鄉邑不願東下今
逼以上命悉令赴關悅躡其後歡邀其前首尾受敵其
勢危矣臣殞身王事誠所甘心恐敗國殄人所損更大
乞少停緩更思後圖徐事誘導漸就東引太祖志在討
悅而未測朝旨且兵衆未集假此爲詞因與元毗及諸
將刑牲盟誓同獎王室初賀拔岳營於河曲有軍吏獨
行忽見一老翁鬚眉皓素謂之曰賀拔岳雖復據有此
衆然終無所成當有一字文家從東北來後必大盛言
訖不見此吏恒與所親言之至是方驗魏帝詔太祖曰

賀拔岳旣殞士衆未有所歸卿可爲大都督卽相統領
知欲漸就東下良不可言今亦徵侯莫陳悅士馬入京
若其不來朕當親自致罰宜體此意不過淹留太祖又
表曰侯莫陳悅違天逆理酷害良臣自以專戮罪重不
恭詔命阻兵永洛疆梁秦隴臣以大宥旣班忍抑私憾
頻問悅及都督可朱渾元等歸闕早晚而悅並維繫使
人不聽反報觀其指趣勢必異圖臣正爲此未敢自拔
兼順衆情乞少停緩太祖乃與悅書責之曰頃者正光
之末天下沸騰塵飛河朔霧塞荆沔故將軍賀拔公攘
袂勃起志寧寓縣授戈南指拯皇靈於已墜擁旄西邁

濟百姓於淪胥西顧無憂繫公是賴勲茂賞隆遂征關
右此乃行路所知不籍一二談也君實名微行薄本無
遠量故將軍降遷高之志篤彙征之理乃申啓朝廷薦
君爲隴右行臺朝議以君功名闕然未之許也遂頻煩
請謁至於再三天子難違上將便相聽許是亦遐邇共
知不復煩之翰墨縱使木石爲心猶當知感況在生靈
安能無愧加以王室多故高氏專權主上虛心寄隆晉
鄭君復與故將軍同受密旨屢結盟約期於畢力共匡
時難而貌恭心狠妬勝嫉賢口血未乾七首已發協黨
國賊共危本朝孤恩負誓有靦面目豈不上畏於天下

漸於地吾以弱才猥當蕃牧蒙朝廷拔擢之恩荷故將
軍國士之遇聞問之日魂守驚馳便陳啓天朝暫來奔
赴衆情所推遂當戎重比有敕旨召吾還闕亦有別詔
令君入朝雖操行無聞而年齒已宿今日進退唯君是
視君若督率所部自山隴東邁吾亦總勒師徒北道還
闕共追廉蔭之迹同慕寇賈之風如其首鼠兩端不時
奉詔專戮違旨國有常刑枕戈坐甲指日相見幸圖利
害無貽噬臍悅旣懼太祖謀已詐爲詔書與秦州刺史
万俟普撥合與悅爲黨接普撥疑之封詔以呈太祖太
祖表之曰臣自奉詔總平涼之師責重憂深不遑啓處

訓兵秣馬唯思竭力前以人戀本土侯莫陳悅窺竊進
退量度且宜住此今若召悅授以內官臣列旆東轅匪
朝伊夕朝廷若以悅堪爲邊扞乞處以瓜涼一藩不然
則終致猜虞於事無益初原州刺史史歸爲岳所親任
河曲之變反爲悅守悅遣其黨王伯和成次安將兵二
千人助歸鎮原州太祖遣都督侯莫陳崇率輕騎一千
襲歸擒之并獲次安伯和等送於平涼太祖表崇行原
州事乃俟普撥又遣其將叱干保洛領二千騎來從軍
三月太祖進軍至原州衆軍悉集諭以討悅之意士卒
莫不懷憤太祖乃表曰臣聞誓死酬恩覆宗報主人倫

所急赴蹈如歸自大都督臣岳歿後臣類奉詔還闕秣
馬戒途志不俟旦直以督將已下咸稱賀拔公視我如
子今讐恥未報亦何面目以處世間若得一雪冤酷萬
死無恨且悅外附疆臣內違朝旨臣今上思逐惡之志
下遂節士之心冀仗天威爲國除害小違大順實在茲
辰克定之後伏待斧鉞夏四月引兵上隴留兄子導爲
都督鎮原州太祖軍令嚴肅秋豪無犯百姓大悅識者
知其有成軍出木峽關大雨雪平地二尺太祖知悅怯
而多猜乃倍道兼行出其不意悅果疑其左右有異志
者左右亦不安衆遂離貳聞大軍且至退保畧陽留二

萬餘人據守永洛太祖至永洛命圍之城降太祖卽率
輕騎數百趣畧陽以臨悅軍悅大懼乃召其部將議之
皆曰此鋒不可當勸悅退保上邽以避之時南秦州刺
史李弼亦在悅軍乃間道遣使請爲內應其夜悅出軍
軍中自驚潰將卒或相率來降太祖縱兵奮擊大破之
虜獲萬餘人馬八千足悅與其子弟及麾下數十騎遁
走太祖曰悅本與曹泥應接不過走向靈州乃令原州
都督導邀其前都督賀拔賴等追其後導至牽屯山追
及悅斬之太祖入上邽收悅府庫財物山積皆以賞士
卒毫釐無所取左右竊一銀鏤甕以歸太祖知而罪之

卽剖賜將士衆大悅時涼州刺史李叔仁爲其民所執
舉州騷擾宕昌羌梁企定引吐谷渾寇金城渭州及南
秦州氏羌連結所在蜂起南岐至于瓜鄯跨州據郡者
不可勝數太祖乃令李弼鎮原州夏州刺史拔也惡耗
鎮南秦州渭州刺史可朱渾元還鎮渭州衛將軍趙貴
行秦州事徵幽涇東秦岐四州粟以給軍齊神武聞秦
隴克捷乃遣使於太祖甘言厚禮深相倚結太祖拒而
不納時齊神武已有異志故魏帝深仗太祖乃徵二千
騎鎮東雍州助爲聲援仍令太祖稍引軍而東太祖乃
遣大都督梁禦率步騎五千鎮河渭合口爲圖河東之

計太祖之討悅也悅遣使請援於齊神武神武使其都督韓軌將兵一萬據蒲坂而雍州刺史賈纘送船與軌請軌兵入關太祖因梁禦之東乃逼召纘赴軍禦遂入雍州魏帝遣著作郎姚幼瑜持節勞軍進太祖侍中驃騎大將軍開府儀同三司關西大都督畧陽縣公承制封拜使持節如故於是以寇洛爲涇州刺史李弼爲秦州刺史前畧陽郡守張獻爲南岐州刺史盧待伯拒代遣輕騎襲擒之待伯自殺時魏帝方圖齊神武又遣徵兵太祖乃令前秦州刺史駱超爲大都督率輕騎一千赴洛進授太祖兼尚書侯射關西大行臺餘官封如故

大祖乃傳檄方鎮曰蓋聞陰陽遞用盛衰相襲苟當百六無間三五皇家創歷陶鑄蒼生保安四海仁育萬物運距孝昌屯沴屢起隴冀騷動燕河狼顧雖靈命重啓蕩定有期而乘釁之徒因生羽翼賊臣高歡器識庸下出自輿皂罕聞禮義直以一介鷹犬効力戎行覲冒恩私遂階榮寵不能竭誠盡節專挾姦回乃勸爾朱榮行茲篡逆及榮以專政伏誅世隆以凶黨外叛歡苦相敦勉令取京師又勸吐萬兒復爲弑虐暫立建明以今天下假推普泰欲竊威權益歸廢斥俱見酷害於是稱兵河北假討爾朱亟通表奏云取讒賊旣行廢黜遂將篡

弑以人望未改恐鼎鑊交及乃求宗室權允人心天方
與魏必將有主翊戴聖明誠非歡力而歡阻兵安忍自
以爲功廣布腹心跨州連郡端揆禁闈莫非親黨皆行
貪虐竄竄生人而舊將名臣正人直士橫生瘡痍動挂
網羅故武衛將軍伊琳清貞剛毅禁旅攸屬直閣將軍
鮮于康仁忠亮驍傑爪牙斯在歡收而戮之曾无聞奏
司空高乾是其黨與每相影響謀危社稷但以姦志未
從恐先洩漏乃密白朝廷使殺高乾方哭對其弟稱天
子橫戮孫騰任祥歡之心驚命使入居樞近伺國間隙
知歡逆謀將發相繼逃歸歡益加撫待亦無陳白然歡

入洛之始本有姦謀令親人蔡攜作牧何濟厚相思贈
以爲東道主人故關西大都督清水公賀拔岳勲德隆
重興亡攸寄歡好亂樂禍深相忌毒乃與侯莫陳悅陰
圖陷害幕府以受律專征便卽討戮歡知逆狀已露稍
懷旅距遂遣蔡攜拒代令竇泰佐之又遣侯景等云向
白馬輔世珍等徑趣石濟高隆之疋婁昭等屯據壺關
韓軌之徒擁衆蒲坂於是上書天子數論得失訾毀乘
輿威侮朝廷藉此微庸冀茲大寶谿壑可盈禍心不測
或言徑赴荆楚開疆於外或言分詣伊洛取彼讒人或
言欲來入關與幕府決戰今聖明御運天下清夷百寮

師師四隩來暨人盡忠良誰爲君側而歡威福自己生
是亂階緝構南箕指鹿爲馬包藏凶逆伺我神器是而
可忍孰不可容幕府折衝宇宙親當受朕銳師百萬殷
騎千羣裹糧坐甲唯敵是俟義之所在糜軀匪恡况頻
有詔書班告天下稱歡逆亂徵兵致伐今便分命將帥
應機進討或趣其要害或襲其窟宅電繞蛇擊霧合星
羅而歡違負天地毒被人鬼乘此掃蕩易同俯拾歡若
渡河稍逼宗廟則分命諸將直取并州幕府躬自東轅
電赴伊洛若固其巢穴未敢發動亦命羣帥百道俱前
輾裂賊臣以謝天下其州鎮郡縣率土人黎或州鄉冠

冕或勲庸世濟並宜捨逆歸順立效軍門封賞之科已
有別格凡百君子可不勉歟太祖謂諸將曰高歡雖智
不足而詐有餘今聲言欲西其意在入洛吾欲令寇洛
率馬步萬餘自涇州東引王羅率甲士一萬先據華州
歡若西來王羅足得抗拒如其入洛寇洛卽襲汾晉吾
便速駕直赴京邑使其進有內顧之憂退有被躡之勢
一舉大定此爲上策衆咸稱善秋七月太祖師衆發自
高平前軍至於弘農而齊神武稍逼京邑魏帝親總六
軍屯於河橋令左衛元斌之領軍斛斯椿鎮武牢遣使
告太祖太祖謂左右曰高歡數日行八九百里曉兵者

所忌正須乘便擊之而主上以萬乘之重不能決戰方緣津據守且長河萬里扞禦爲難若一處得度大事去矣卽以大都督趙貴爲別道行臺自蒲坂濟趣并州遣大都督李賢將精騎一千赴洛陽會斌之與斛斯椿爭權不協斌之遂棄椿還給帝云高歡兵至七月丁未帝遂從洛陽率輕騎入關太祖備儀衛奉迎謁見東陽驛太祖免冠泣涕謝曰臣不能式遏寇虐遂使乘輿遷幸請拘司敗以正刑書帝曰公之忠節曝於朝野朕以不德負乘致寇今日相見深用厚顏責在朕躬無勞謝也乃奉帝都長安披草萊立朝廷軍國之政咸取太祖決

焉仍加授大將軍雍州刺史兼尚書令進封略陽郡公別置二尚書隨機處分解尚書僕射餘如故太祖固讓詔敦諭乃受初魏帝在洛陽許以馮翊長公主配太祖未及結納而帝西遷至是詔太祖尚之拜駙馬都尉八月齊神武襲陷潼關侵華陰太祖率諸軍屯霸上以待之齊神武留其將薛瑾守關而退太祖乃進軍討瑾虜其卒七千還長安進位丞相冬十月齊神武推魏清河王亶子善見爲主徙都於鄴是爲東魏十一月遣儀同李虎與李弼趙貴等討曹泥於靈州虎引河灌之明年泥降遷其豪帥于咸陽閏十二月魏孝武帝崩太祖與

羣公定策尊立魏南陽王寶炬為嗣是為文皇帝

周書卷一終

周書卷二

帝紀第二

唐令狐德棻等撰

皇明朝列大夫國子監丞蕭雲舉

勅重較刊

皇明朝列大夫國子監丞吳士元

旨重修

文帝下

魏大統元年春正月己酉進太祖督中外諸軍事錄尚

書事大行臺改封安定郡王太祖固讓王及錄尚書事

魏帝許之乃改封安定郡公東魏遣其將司馬子如寇

潼關太祖軍霸上子如乃回軍自蒲津寇華州刺史王

巖擊走之三月太祖以戎役屢興民吏勞弊乃命所司斟酌今古參考變通可以益國利民便時適治者爲二十四條新制奏魏帝行之

二年春三月東魏襲陷夏州留其將張瓊許和守之夏五月秦州刺史建中王万俟普撥率所部叛入東魏太祖勒輕騎追之至河北千餘里不及而還

三年春正月東魏寇龍門屯軍蒲坂造三道浮橋度河又遣其將竇泰趣潼關高敖曹圍洛州太祖出軍廣陽召諸將曰賊今倚吾三面又造橋於河示欲必渡是欲殺吾軍使竇泰得西入耳久與相持其計得行非良策

也且歡起兵以來秦每爲先驅其下多銳卒屢勝而驕今出其不意襲之必克克秦則歡不戰而自走矣諸將咸曰賊在近捨而遠襲事若蹉跌悔無及也太祖曰歡前再襲潼關吾軍不過霸上今者大來兵未出郊賊顧謂吾但自守耳無遠關意又狃於得志有輕我之心乘此擊之何往不克賊雖造橋不能徑渡此五日中吾取竇泰必矣公等勿疑庚戌太祖率騎六千還長安聲言欲保隴右辛亥謁帝而潛出軍癸丑旦至小關竇泰卒聞軍至惶懼依山爲陣未及成列太祖縱兵擊破之盡俘其衆萬餘人斬泰傳首長安高敖曹適陷洛州執刺

史泉企聞秦之歿焚輜重弃城走齊神武亦撤橋而退
企子元禮尋復洛州斬東魏刺史杜密太祖還軍長安
六月遣儀同于謹取楊氏壁太祖請罷行臺帝復申前
命太祖受錄尚書事餘固讓乃止秋七月徵兵會咸陽
八月丁丑太祖率李弼獨孤信梁禦趙貴于瑾若干惠
怡峯劉亮王惠侯莫陳崇李遠達奚武等十二將東伐
至潼關太祖乃誓於師曰與爾有衆奉天威誅暴亂惟
爾士整爾甲兵戒爾戎事無貪財以輕敵無暴民以作
威用命則有賞不用命則有戮爾衆士其勉之遣于謹
居軍前徇地至槃豆東魏將高叔禮守柵不下謹急攻

之乃降獲其戍卒一千送叔禮於長安戊子至弘農東
魏將高干陝州刺史李徽伯拒守於時連雨太祖乃命
諸軍冒雨攻之庚寅城潰斬徽伯虜其戰士八千高干
走度河令賀拔勝追擒之並送長安於是宜陽邵郡皆
來歸附先是河南豪傑多聚兵應東魏至是各率所部
來降齊神武懼率衆十萬出壺口趨蒲坂將自后土濟
又遣其將高敖曹以三萬人出河南是歲關中饑太祖
旣平弘農因館穀五十餘日時戰士不滿萬人聞齊神
武將度乃引軍入關齊神武遂度河逼華州刺史王黑
嚴守知不可攻乃涉洛軍於許原西太祖據渭南徵諸

州兵皆會乃召諸將謂之曰高歡越山度河遠來至此
天亡之時也吾欲擊之何如諸將咸以衆寡不敵請待
歡更西以觀其勢太祖曰歡若得至咸陽人情轉騷擾
今及其新至便可擊之卽造浮橋於渭今軍人齎三日
糧輕騎度渭輜重自渭南夾渭而西冬十月壬辰至沙
苑距齊神武軍六十餘里齊神武聞太祖至引軍來會
癸巳旦候騎告齊神武軍且至太祖召諸將謀之李弼
曰彼衆我寡不可平地置陣此東十里有渭曲可先據
以待之遂進軍至渭曲背水東西爲陣李弼爲右拒趙
貴爲左拒命將士皆偃戈於葭蘆中間鼓聲而起申時

齊神武至望太祖軍少競馳而進不爲行列總萃於左
軍兵將交太祖鳴鼓士皆奮起于謹等六軍與之合戰
李弼等率鐵騎橫擊之絕其軍爲二隊大破之斬六千
餘級臨陣降者二萬餘人齊神武夜遁追至河上復大
克獲前後虜其卒七萬留其甲士二萬餘悉縱歸收其
輜重兵甲獻俘長安還軍渭南於是所徵諸州兵始至
乃於戰所准當時兵士人種樹一株以旌武功進太祖
柱國大將軍增邑并前五千戶李弼等十二將亦進爵
增邑并其下將士賞各有差遣左僕射馮翊王元季海
爲行臺與開府獨孤信率步騎二萬向洛陽洛州刺史

李顯趨荊州賀拔勝李弼渡河圍蒲坂牙門將高子信
開門納勝軍東魏將薛崇禮弃城走勝等追獲之太祖
進軍蒲坂畧定汾絳於是許和殺張瓊以夏州降初太
祖自弘農入關後東魏將高敖曹圍弘農聞其軍敗退
守洛陽獨孤信至新安敖曹復走度河信遂入洛陽東
魏潁川長史賀若統與密縣人張儉執刺史田迅舉城
降滎陽鄭榮業鄭偉等攻梁州擒其刺史鹿永吉清河
人崔彥穆檀琛攻滎陽擒其郡守蘇定皆來附自梁陳
已西將吏降者相屬於是東魏將堯雄趙育是云寶出
潁川欲復降地太祖遣儀同宇文貴梁遷等逆擊大破

之趙育來降東魏復遣將任祥率河南兵與雄合儀同
怡峯與貴遷等復擊破之又遣都督韋孝寬取豫州是
云寶殺其東揚州刺史郝椿以州來附

四年春三月太祖率諸將入朝禮畢還華州七月東魏
遣其將侯景庫狄干高敖曹元軌可朱渾元莫多婁貸
文等圍獨孤信於洛陽齊神武繼其後先是魏帝將幸
洛陽拜園陵會信被圍詔太祖率軍救信魏帝亦東八
月庚寅太祖至穀城莫多婁貸文可朱渾元來逆臨陣
斬貸文元單騎遁免悉虜其衆送弘農遂進軍瀍東是
夕魏帝幸太祖營於是景等夜解圍去及旦太祖率輕

騎追之至於河上景等北據河橋南屬邛山爲障與諸軍合戰太祖馬中流矢驚逸遂失所之因此軍中擾亂都督李穆下馬授太祖軍以復振於是大捷斬高敖曹及其儀同李猛西兗州刺史宋顯等虜其甲士一萬五千赴河死者以萬數是日置陣旣大首尾懸遠從旦至未戰數十合氛霧四塞莫能相知獨孤信李遠居右趙貴怡峯居左戰並不利又未知魏帝及太祖所在皆奔其卒先歸開府李虎念賢等爲後軍遇信等退卽與俱還由是乃班師洛陽亦失守大軍至弘農守將皆已棄城西走所虜降卒在弘農者因相與閉門拒守進攻拔

之誅其魁首數百人大軍之東伐也關中留守兵少而前後所虜東魏士卒皆散在民間乃謀爲亂及李虎等至長安計無所出乃與公卿輔魏太子出次渭北關中大震恐百姓相剽劫於是沙苑所俘軍人趙青雀雍州民于伏德等遂反青雀據長安子城伏德保咸陽與太守慕容思慶各收降卒以拒還師長安大城民皆相率拒青雀每日接戰魏帝留止閩鄉遣太祖討之長安父老見太祖至悲且喜曰不意今日復得見公士女咸相賀華州刺史導率軍襲咸陽斬思慶擒伏德南度渭與太祖會攻青雀破之太傅梁景睿先以疾留長安遂與

青雀通謀至是亦伏誅關中於是乃定魏帝還長安太祖復屯華州冬十一月東魏將侯景攻陷廣州十二月是云寶襲洛陽東魏將王元軌棄城走都督趙剛襲廣州拔之自襄廣以西城鎮復內屬

五年冬大閱於華陰

六年春東魏將侯景出三鵞將侵荊州太祖遣開府李弼獨孤信各率騎五千出武關景乃退還夏茹茹度河至夏州太祖召諸軍屯沙苑以備之

七年春三月稽胡帥夏州刺史劉平伏據上郡叛遣開府于謹討平之冬十一月太祖奏行十二條制恐百官

不勉於職事又下令申明之

八年夏四月大會諸軍於馬牧冬十月齊神武侵汾絳圍玉壁太祖出軍蒲坂將擊之軍至皂莢齊神武退太祖度汾追之遂遁去十二月魏帝狩於華陰大饗將士太祖率諸將朝於行在所

九年春東魏北豫州刺史高仲密舉州來附太祖帥師迎之令開府李遠爲前軍至洛陽遣開府于謹攻栢谷塢拔之三月齊神武至河北太祖還軍灑上以引之齊神武果度河據邗山爲陣不進者數日太祖留輜重於灑曲士皆銜枚夜登邗山未明擊之齊神武軍騎爲賀

拔勝所逐僅而獲免太祖率右軍若干惠等大破齊神武軍悉虜其步卒趙貴等五將軍居左戰不利齊神武軍復合太祖又不利夜乃引還既入關屯渭上齊神武進至陝開府達奚武等率軍禦之乃退太祖以邛山之戰諸將失律上表請自貶魏帝報曰公膺期作宰義高匡合仗鉞專征舉無遺筭朕所以垂拱九載實資元輔之力俾九服寧謐誠賴翊贊之功今大寇未殄而以諸將失律便欲自貶深虧體國之誠宜抑此謙光恤予一人於是廣募關隴豪右以增軍旅冬十月大閱於櫟陽還屯華州

十年夏五月太祖入朝秋七月魏帝以太祖前後所上二十四條及十二條新制方爲中興永式乃命尚書蘇綽更損益之總爲五卷班於天下於是搜簡賢才以爲牧守令長皆依新制而遣焉數年之間百姓便之冬十月大閱於白水

十一年春三月令曰古之帝王所以外建諸侯內立百官者非欲富貴其身而尊榮之蓋以天下至廣非一人所能獨治是以博訪賢才助已爲治若其知賢也則以禮命之其人聞命之日則慘然曰凡受人之事任人之勞何捨已而從人又自勉曰天生雋士所以利時彼人

博

王者欲與我爲治安可苟辭於是降心而受命及居官也則晝不甘食夜不甘寢思所以上匡人主下安百姓不遑恤其私而憂其家故妻子或有饑寒之弊而不顧也於是人主賜之以俸祿尊之以軒冕而不以爲惠也賢臣受之亦不以爲德也位不虛加祿不妄賜爲人君者誠能以此道授官爲人臣者誠能以此情受位則天下之大可不言而治矣昔堯舜之爲君稷契之爲臣用此道也及後世衰微此道遂廢乃以官職爲私恩爵祿爲榮惠人君之命官也親則授之愛則任之人臣之受位也可以尊身而潤屋者則迂道而求之損身而利物

者則巧言而辭之於是至公之道沒而姦詐之萌生天下不治正爲此矣今聖王中興思去澆僞諸在朝之士當念職事之艱難負闕之招累夙夜兢兢如臨深履薄才堪者則審已而當之不堪者則收短而避之使天官不妄加王爵不虛受則淳素之風庶幾可反冬十月大閱於白水遂西狩岐陽

十二年春涼州刺史宇文仲和據州反瓜州民張保害刺史成慶以州應仲和太祖遣開府獨孤信討之東魏遣其將侯景侵襄州太祖遣開府若干惠率輕騎擊之至穰景遁去夏五月獨孤信平涼州擒仲和遷其民六

千餘家於長安瓜州都督令狐延起義誅張保瓜州平
七月太祖大會諸軍於咸陽九月齊神武圍王壁大都
督韋孝寬力戰拒守齊神武攻圍六旬不能下其士卒
死者什二三會齊神武有疾燒營而退

十三年春正月茹茹寇高平至于方城是月齊神武薨
其子澄嗣是爲文襄帝與其河南大行臺侯景有隙景
不自安遣使請舉河南六州來附齊文襄遣其將韓軌
庫狄干等圍景於潁川三月太祖遣開府李弼率軍接
之軌等遁去景請留收輯河南遂徙鎮豫州於是遣開
府王思政據潁川弼引軍還秋七月侯景密圖附梁太

祖知其謀悉追還前後所配景將士景懼遂叛冬太祖
奉魏帝西狩於岐陽

十四年春魏帝詔封太祖長子毓爲寧都郡公食邑三
千戶初太祖以平元顥納孝莊帝之功封寧都縣子至
是改縣爲郡而以封毓用彰勤王之始也夏五月進授
太祖太師太祖奉魏太子巡撫西境自新平出安定登
隴刻石紀事下安陽至原州歷北長城大狩將東趣五
原至蒲川聞魏帝不豫遂還旣至帝疾已愈於是還華
州是歲東魏遣其將高岳慕容紹宗劉豐生等率衆十
餘萬圍王思政於潁川

十五年春太祖遣大將軍趙貴帥軍至穰兼督東南諸州兵以援思政高岳起堰引洧水以灌城自潁川以北皆爲陂澤救兵不得至夏六月潁川陷初侯景自豫州附梁後遂度江圍建業梁司州刺史柳仲禮以本朝有難帥兵援之梁竟陵郡守孫暲舉郡來附太祖使大都督符貴往鎮之及景克建業仲禮還司州率衆來寇暲以郡叛太祖大怒冬十一月遣開府楊忠率兵與行臺僕射長孫儉計之攻克隨郡忠進圍仲禮長史馬岫於安陸是歲盜殺齊文襄於鄴其弟洋討賊擒之仍嗣其事是爲文宣帝

十六年春正月柳仲禮率衆來援安陸楊忠逆擊於淝頭大破之擒仲禮悉虜其衆馬岫以城降三月魏帝封太祖第二子震爲武邑公邑二千戶先是梁雍州刺史岳陽王啓與其叔父荊州刺史湘東王繹不睦乃稱蕃來附遣其世子焱爲質及楊忠擒仲禮繹懼復遣其子方平來朝夏五月齊文宣廢其主元善見而自立秋七月太祖率諸軍東伐拜韋武公導爲大將軍總督留守諸軍事屯涇北以鎮關中九月丁巳車出長安時連雨自秋及冬諸軍馬驢多死遂於弘農北造橋濟河自蒲坂還於是河南自洛陽河北自平陽以東遂入於齊矣

十七年春三月魏文帝崩皇太子嗣位太祖以冢宰總百揆梁邵陵王蕭綸侵安陸大將軍楊忠討擒之冬十月太祖遣大將軍王雄出于午伐上津魏興大將軍達奚武出散關伐南鄭

魏廢帝元年春王雄平上津魏興以其地置東梁州夏四月達奚武圍南鄭月餘梁州刺史宜豐侯蕭循以州降武執循還長安秋八月東梁州民叛率眾圍州城太祖復遣王雄討之侯景之克建業也還奉梁武帝為主居數旬梁武以憤恚薨又立其子綱尋而廢綱自立歲餘綱弟繹討景擒之遣其舍人魏彥來告仍嗣位於

江陵是爲元帝

二年春魏帝詔太祖去丞相大行臺爲都督中外諸軍事二月東梁州平遷其豪帥於雍州三月太祖遣大將軍魏安公尉遲迴率眾伐梁武陵王蕭紀於蜀夏四月太祖勒銳騎三萬西踰隴度金城河至姑臧吐谷渾震懼遣使獻其方物五月蕭紀潼州刺史楊乾運以州降引迴軍向成都秋七月太祖自姑臧至於長安八月克成都劔南平冬十一月尚書元烈謀作亂事發伏誅三年春正月始作九命之典以叙內外官爵以第一品爲九命第九品爲一命改流外品爲九秩亦以九爲上

又改置州郡及縣改東雍爲華州北雍爲宜州南雍爲
蔡州華州爲同州北華爲鄜州東秦爲隴州南秦爲成
州北秦爲交州東荆爲淮州南荆爲昌州東夏爲延州
南夏爲長州東梁爲金州南梁爲隆州北梁爲靜州陽
都爲汾州南汾爲勳州汾州爲丹州南幽爲寧州南岐
爲鳳州南洛爲上州南廣爲清州南襄爲湖州西涼爲
甘州西郢爲鴻州西益爲利州東巴爲集州北應爲輔
州恒州爲均州沙州爲深州寧州爲麓州義州爲巖州
新州爲溫州江州爲沔州西安爲鹽州安州爲始州并
州爲隨州肆州爲塘州吳州爲順州淮州爲純州揚州

爲潁州司州爲憲州南平爲昇州南郢爲歸州青州爲
眉州凡改州四十六置州一改郡一百六改縣二百三
十自元烈誅魏帝有怨言魏淮安王育廣平王贊等垂
泣諫之帝不聽於是太祖與公卿定議廢帝尊立齊王
廓是爲恭帝

魏恭帝元年夏四月帝大饗羣臣魏史柳虬執簡書於
朝曰廢帝文皇帝之嗣子年七歲文皇帝託於安定公
曰是子才由于公不才亦由于公宜勉之公旣受茲重
寄居元輔之任又納女爲皇后遂不能訓誨有成致令
廢黜負文皇帝付屬之意此咎非安定公而誰太祖乃

令太常盧辯作告諭公卿曰嗚呼我羣后暨衆士維文
皇帝以襁褓之嗣託於予訓之誨之庶厥有成而予罔
能革變厥心庸暨乎廢墜我文皇帝之志嗚呼茲咎予
其焉避予實知之矧爾衆人之心哉惟予之顏豈惟今
厚將恐來世以予爲口實乙亥詔封太祖子邕爲輔城
公憲爲安城公邑各二千戶茹茹乙旃達官寇廣武五
月遣柱國趙貴追擊之斬首數千級收其輜重而還秋
七月太祖西狩至於原州梁元帝遣使請據舊圖以定
疆界又連結於齊言辭悖慢太祖曰古人有言天之所
棄誰能興之其蕭繹之謂乎冬十月壬戌遣柱國于謹

中山公護大將軍楊忠韋孝寬等步騎五萬討之十一
月癸未師濟於漢中山公護與楊忠率銳騎先屯其城
下據江津以備其逸丙申謹至江陵列營圍守辛亥進
攻城其日克之擒梁元帝殺之并虜其百官及士民以
歸沒爲奴婢者十餘萬其免者二百餘家立蕭詧爲梁
主居江陵爲魏附庸梁將王僧辯陳霸先於丹陽立梁
元帝第九子方智爲主魏氏之初統國三十六大姓九
十九後多絕滅至是以諸將功高者爲三十六國後次
功者爲九十九姓後所統軍人亦改從其姓
二年梁廣州刺史王琳寇邊冬十一月遣大將軍豆盧

寧帥師討之

三年春正月丁丑初行周禮建六官以太祖爲太師大冢宰在國李弼爲太傅大司徒趙貴爲太保太宗伯獨孤信爲大司馬于謹爲大司寇侯莫陳崇爲大司空初太祖以漢魏官繁思革前弊大統中乃命蘇綽盧辯依周制改制其事尋亦置六卿官然爲撰次未成衆務猶歸臺閣至是始畢乃命行之夏四月太祖北巡狩秋七月度北河王琳遣使來附以琳爲大將軍長沙郡公魏帝封太祖子直爲秦郡公招爲正平公邑各一千戶九月太祖有疾還至雲陽命中山公護受遺輔嗣子冬十月

月乙亥崩於雲陽宮還長安發喪時年五十二甲申葬於成陵諡曰文公孝閔帝受禪追尊爲文王廟曰太祖武成元年追尊爲文皇帝太祖知人善任使從諫如流崇尚儒術明達政事恩信被物能駕馭英豪一見之者咸思用命沙苑所獲囚俘釋而用之河橋之役率以擊戰皆得其死力諸將出征授以方畧無不制勝性好朴素不尚虛飾恒以反風俗復古始爲心

史臣曰水曆將終羣凶放命或威權震主或釁逆滔天咸謂大寶可以力征神物可以求得莫不闕闕九鼎睨睨兩宮而誅夷繼及亡不旋踵是知巨君篡盜終成建

武之資仲穎凶殘實啓當塗之業天命有底庸可滔乎
太祖田無一成衆無一旅驅馳戎馬之際躡足行伍之
間屬與能之時應啓聖之運鳩集義勇糾合同盟一舉
而殄仇讐再駕而匡帝室於是內詢帷幄外仗材雄推
至誠以待人弘大順以訓物高氏籍甲兵之衆恃戎馬
之彊屢入近畿志圖吞噬及英謀電發神旆風馳弘農
建城濮之勲沙苑有昆陽之捷取威定霸以弱爲彊紹
元宗之衰緒創隆周之景命南清江漢西舉巴蜀北控
沙漠東據伊瀍乃擯落魏晉憲章古昔脩六官之廢典
成一代之鴻規德刑並用勲賢兼叙遠安邇悅俗阜民

和億兆之望有歸揖讓之期允集功業若此人臣以終
盛矣哉非夫雄畧冠時英姿不世天與神綬緯武經文
者孰能與於此乎昔者漢獻崇塵曹公成夾輔之業晉
安播蕩宋武建匡合之勲校德論功綽有餘裕至於渚
官制勝圍城擊戮茹茹歸命盡種誅夷雖事出於權道
而用垂於德教周祚之不永或此之由乎

德

周書卷二終

周書卷三

帝紀第三

唐令狐德棻等撰

皇明朝列大夫國子監祭酒臣蕭雲舉

承德郎右春坊右中允管司業事臣李騰芳等奉

勅重較刊

皇明朝列大夫國子監祭酒臣吳山元

承德郎司業仍加添一級臣黃錦等奉

旨重修

孝閔帝

孝閔皇帝諱覺字陁羅尼太祖第三子也母曰元皇后
大統八年生於同州官舍九歲封畧陽郡公時有善相
者史元華見帝退謂所親曰此公子有至貴之相但恨
其壽不足以稱之耳魏恭帝三年三月命為安定公世

子四月拜大將軍十月乙亥太祖崩丙子嗣位太師大
冢宰十二月丁亥魏帝詔以岐陽之地封帝爲周公庚
子禪位於帝詔曰予聞皇天之命不於常惟歸於德故
堯授舜舜授禹時其宜也天厭我魏邦垂變以告惟爾
罔弗知予雖不明敢弗冀天命格有德哉今踵唐虞舊
典禪位於周庸布告遐邇焉使大宗伯趙貴持節奉冊
書曰咨爾周公帝王之位弗有常有德者受命時乃天
道予式時庸荒求於唐虞之羹踵曰我魏德之終舊矣
我邦小大罔弗知今其可久怫於天道而不歸有德歟
時用詢謀僉曰公昭考文公格勲德於天地丕濟生民

消公躬又宜重光故玄象徵見於上謳訟奔走於下天
之歷數用實在焉予安敢弗若是以欽祗聖典遜位於
公公其享茲大命保有萬國可不慎歟魏帝臨朝遣民
部中大夫濟北公元迪致皇帝璽紱固辭公卿百辟勸
進太師陳祥瑞乃從之是日魏帝遜于大司馬府元年
春正月辛丑卽天王位柴燎告天朝百官於路門追尊
皇考文公爲文王皇妣爲文后大赦天下封魏帝爲宋
公是日槐里獻赤雀四百官奏議云帝王之興罔弗更
正朔明受之於天華民視聽也逮於尼父稽諸陰陽云
行夏之時後王所不易今魏曆告終周室受命以木承

水寔當行錄正用夏時式遵聖道惟文王誕玄氣之祥
有黑水之讖服色宜烏制曰可以大司徒趙郡公李弼
爲太師大宗伯南陽公趙貴爲太傅大冢宰大司馬河
內公獨孤信爲太保大宗伯柱國中山公護爲大司馬
以大將軍寧都公毓高陽公達奚武武陽公豆盧寧小
司寇陽平公李遠小司馬博陵公賀蘭祥小宗伯魏安
公尉遲迥等並柱國壬寅祠圓丘詔曰予本自神農其
於二丘宜作厥主始祖獻侯啓土遼海肇有國基配南
北郊文考德符五運受天明命祖于明堂以配上帝廟
爲太祖癸卯祠方丘甲辰祠太社初除市門稅乙巳祠

太廟丁未會百官於乾安殿班賞各有差戊申詔曰上
天有命革魏於周致予一人受茲大號予惟古先聖王
罔弗先于省視風俗以求民瘼然後克治矧予眇眇又
當草昧若弗尚于達四聰明四目之訓者其有聞知哉
有司宜分命方別之使所在巡撫五教何者不宣時政
有何不便得無脩身潔已才堪佐世之人而不爲上所
知冤枉受罰幽辱于下之徒而不爲上所理孝義貞節
不爲有司所申鰥寡孤窮不爲有司所恤暨黎庶衣食
豐約賦役繁省災厲所興水旱之處並宜具聞若有年
八十已上所在就加禮餼辛亥祠南郊壬子立皇后元

氏乙卯詔曰惟天地草昧建邦以寧今可大啓諸國爲
周藩屏於是封太師李弼爲趙國公太傅趙貴爲楚國
公太保獨孤信爲衛國公大司寇于謹爲燕國公大司
空侯莫陳崇爲梁國公大司馬中山公護爲晉國公邑
各萬戶辛酉祠太廟癸亥親耕籍田丙寅於劔南陵并
置陵州武康郡置資州遂寧郡置遂州二月癸酉朝日
於東郊乙亥改封永昌郡公廣爲天水郡公戊寅祠太
社丁亥楚國公趙貴謀反伏誅詔曰朕文考昔與羣公
洎列將衆官同心戮力共治天下自始及終二十三載
迭相匡弼上下無怨是以羣公等用升余於大位朕雖

不德豈不識此是以朕於羣公同姓者如弟兄異姓者
如甥舅冀此一心平定宇內各令子孫享祀百世而朕
不明不能輯睦致使楚公貴不悅于朕與万侯幾通叱
奴與王龍仁長孫僧衍等陰相假署圖危社稷事不克
行爲開府宇文盛等所告及其推究咸伏厥辜興言及
此心焉如癘但法者天下之法朕旣爲天下守法安敢
以私情廢之書曰善善及後世惡惡止其身其貴通興
龍仁罪止一家僧衍止一房餘皆不問惟爾文武咸知
時事太保獨孤信有罪免甲午以大司空梁國公侯莫
陳崇爲太保大司馬晉國公護爲大冢宰在國博陵公

賀蘭祥爲大司馬高陽公達奚武爲大司寇大將軍化
政公宇文貴爲柱國己亥秦州涇州各獻木連理歲星
守少微經六十日三月庚子會文武百官班賜各有差
已酉柱國衛國公獨孤信賜死壬子詔曰浙州去歲不
登厥民饑饉朕用愍焉其當州租輸未畢者悉宜免之
兼遣使巡檢有窮餒者並加振給癸亥省六府士員三
分減一夏四月己巳以少師平原公侯莫陳順爲柱國
壬申詔死罪以下各降一等壬午謁成陵乙酉還宮丁
亥祠太廟五月癸卯歲星犯太微上將太白犯軒轅已
酉槐里獻白鸛帝欲觀漁於昆明池博士姜須諫乃止

秋七月壬寅帝聽訟於右寢多所哀宥甲辰月掩心後
星辛亥祠太廟熒惑犯東井北端第二星八月戊辰祠
太社辛未詔曰朕甫臨大位政教未孚使我民農多陷
刑網今秋律已應將行大戮言念羣生責在於朕宜從
肆青與其更新其犯者宜降從流流以下各降一等不
在赦限者不從此降甲午詔曰帝王之治天下罔弗博
求衆才以又厥民今二十四軍宜舉賢良堪治民者軍
列九人被舉之人於後不稱厥任者所舉官司皆治其
罪九月庚申詔曰朕聞君臨天下者非由一人時乃上
下同心所致今文武之官及諸軍人不霑爵封者宜各

授兩大階改太守爲郡守帝性剛果見晉公護執政深
忌之司會李植軍司馬孫恒以先朝佐命入侍左右亦
疾護之專乃與官伯乙弗鳳賀拔提等潛謀請帝誅護
帝然之又引官伯張光洛同謀光洛密白護護乃出植
爲梁州刺史恒爲潼州刺史鳳等遂不自安更奏帝將
召羣公入因此誅護光洛又白之時小司馬尉遲綱總
統宿衛兵護乃召綱共謀廢立令綱入殿中詐呼鳳等
論事既至以次執送護第並誅之綱仍罷散禁兵帝方
悟無左右獨在內殿令官人持兵自守護又遣大司馬
賀蘭祥逼帝遜位遂幽於舊邸月餘日以弑崩時年十

六植恒等亦遇害及武帝誅護後乃詔曰慎始敬終有
國彞典事亡如存哲王通制義崇追遠禮貴尊親故路
陽公至德純粹天姿秀傑世屬魏祚告終寶命將改謳歌
允集曆數攸歸上協蒼靈之慶下昭后祇之錫而禍生
肘腋釁起蕭牆白獸噬駭蒼鷹集殿幽辱神器弑酷乘
輿寃結生民毒流寓縣今河海澄清氛沴消蕩追尊之
禮宜崇徽號遣太師蜀國公過於南郊上謚曰孝閔皇
帝陵曰靜陵

史臣曰孝閔承旣安之業應樂推之運柴天竺物正位
君臨邇無異言遠無異望雖黃初代德太始受終不之

尚也然政由甯氏王懷芒刺之疑祭則寡人臣無復子之請以之速禍宜哉

周書卷三

周書卷四

帝紀第四

唐令狐德棻等撰

皇明朝列大夫國子監祭酒臣王雲舉

勅重較刊承德郎有春坊右中允管司業事臣太子騰芳等奉

皇明朝列大夫國子監祭酒臣吳士元

青重修承德郎司業仍加俸一級臣黃錦等奉

明帝

世宗明皇帝諱毓小名統萬突太祖長子也母曰姚夫人永熙三年太祖臨夏州生帝於統萬城因以名焉大統十四年封寧都郡公十六年行華州事尋拜開府儀同三司宜州諸軍事宜州刺史魏恭帝三年授大將軍

鎮隴右孝閔帝踐祚進位柱國轉岐州諸軍事岐州刺史治有美政黎民懷之及孝閔帝廢晉公護遣使迎帝於岐州秋九月癸亥至京師止於舊邸甲子羣臣上表勸進備法駕奉迎帝固讓羣臣固請是日即天王位大赦天下乙丑朝羣臣於延壽殿冬十月癸酉太師趙國公李弼薨巳卯以大將軍昌平公尉遲綱為柱國乙酉祠圓丘丙戌祠方丘甲午祠太社柱國陽平公李遠賜死是月梁相陳霸先廢其主蕭方智而自立是為陳武帝十一月庚子祠太廟丁未祠圓丘丁巳詔曰帝王之道以寬仁為大魏政諸有輕犯未至重罪及諸村民一

家有犯乃及數家而被遠配者並宜放還十二月庚午謁成陵癸酉還宮庚辰以大將軍輔城公邕為柱國戊子赦長安見囚甲午詔曰善人之後猶累世獲宥况魏氏以德讓代終豈容不加隱卹元氏子女自坐趙貴等事以來所有沒入為官口者悉宜放免

二年春正月乙未以大夫李魯公護為太師辛亥親耕籍田癸丑立王后獨孤氏丁巳雍州置十二郡又於河東置蒲州河北置虞州弘農置陝州正平置絳州宜陽置熊州邵郡置邵州二月癸未詔曰王者之宰民也莫不同四海一遠近為父母而子之一物失所若納于隍

賊之境土本同大化往因時難致阻東西遂使疆場之
間互相抄掠興言及此良可哀傷自元年已來有被掠
入賊者悉可放免自冬不雨至於是月方大雪三月甲
午齊北豫州刺史司馬消難舉州來附遣柱國高陽公
達奚武與大將軍楊忠率眾迎之改雍州刺史為雍州
牧京兆郡守為京兆尹以廣業脩城二郡置康州葭蘆
郡置文州戊申長安獻白雀庚申詔曰三十六國九十
九姓自魏氏南徙皆稱河南之民今周室既都關中宜
改稱京兆人夏四月己巳以太師晉公護為雍州牧庚
午熒惑入軒轅辛未降死罪一等五歲刑己下皆原之

甲戌王后獨孤氏崩甲申葬敬后五月乙未以大司空
梁國公侯莫陳崇為大宗伯六月癸亥嘯嗟遣使獻方
物己巳板授高年刺史守令恤鰥寡孤獨各有差分長
安為萬年縣金治京城辛未幸昆明池壬申長安獻白
鳥遣使分行州郡理囚徒察風俗掩骼埋胔秋七月甲
午遣柱國寧蜀公尉遲迥率眾於河南築安樂城丙申
順陽獻三足鳥八月甲子羣臣上表稱慶詔曰夫天不
愛寶地稱表瑞莫不威鳳巢閣圖龍躍沼豈直日月珠
連風雨玉燭是以鈞命決曰王者至孝則出元命苞曰
人君至治所有虞舜烝烝來茲異趾周文翼翼翔此靈

周書卷四
三
禽文考至德下覃遺仁爰被遠符千載降斯三足將使
三方歸本九州翕定惟此大體景福在民予安敢讓宗
廟之善弗宣大惠可大赦天下文武官普進二級九月
辛卯以大將軍楊忠大將軍楊雄並爲柱國甲辰封少
師元羅爲韓國公以紹魏後丁未幸同州過故宅賦詩
曰玉燭調秋氣金輿歷舊宮還如過白水更似入新豐
霜潭漬晚菊寒井落疎桐舉盃延故老令聞歌大風冬
十月辛酉還宮乙丑遣柱國尉遲迥鎮隴右長安獻白
兔十二月辛酉突厥遣使獻方物癸亥太廟成辛巳以
功臣琅邪貞獻公賀拔勝等十三人配享太祖廟庭壬

平大赦天下

武成元年春正月巳酉太師晉公護上表歸政帝始親
覽萬機軍旅之事護猶總馬初改都督諸州軍事爲總
管丙辰封大將軍章武孝公導子亮爲永昌公翼爲西
陽公三月癸巳陳六軍帝親擐甲胄迎太白於東方秦
郡公直鎮蒲州吐谷渾寇邊庚戌遣大司馬博陵公賀
蘭祥率衆討之四月戊午武當郡獻赤烏甲戌雲秦州
獻白馬朱鬣五月戊子詔曰皇王之迹不一因革之道
已殊莫不播八政以成物兆三元而爲紀是以容成創
定於軒轅羲和欽若於唐世鴻範九疇大弘五法易曰

澤中有火華君子以治曆明時故曆之爲義大矣但忽
微成象象極則差分積命時時積斯外開闢至于獲麟
二百七十六萬歲畧度推移餘分盈縮南正無聞疇人
靡記暑往寒來理乖攸序敬授民時何其積謬昔漢世
巴郡洛下閼善治曆云後八百歲當有聖人定之自火
行至今木德應其運矣朕何讓焉可命有司傍稽六曆
仰觀七曜博推古今造我周曆量定以聞己亥聽訟於
正武殿辛亥以大宗伯梁國公侯莫陳崇爲大司徒大
司寇高陽公達奚武爲大宗伯武陽公豆盧寧爲大司
寇柱國輔城公邕爲大司空乙卯詔曰比屢有紕發官

司赦前事此雖意在疾惡但先王制肆眚之道令天下
自新若又推問自新何由哉如此之徒有司勿爲推寃
惟慮廢倉廩與海內所共漢帝有云朕爲天下守財耳
若有侵盜公家財畜錢粟者魏朝之事年月旣遠一不
須問自周有天下以來雖經赦宥而事跡可知者有司
宜卽推窮得實之日但免其罪徵備如法賀蘭祥攻拔
洮陽洪和二城吐谷渾遁走閏月庚申高昌遣使獻方
物六月戊子大雨霖詔曰昔唐咨四嶽殷告六眚觀災
典懼咸寘時雍朕撫運應圖作民父母弗敢怠荒以求
民瘼而霖雨作沴害麥傷苗墮屋漂垣洎于昏墊諒朕

不德蒼生何咎刑政所失罔識厥由公卿大夫士爰及
牧守黎庶等今宜各上封事讜言極諫罔有所諱朕將
覽察以答天譴其遭水者有司可時巡檢條列以聞庚
子詔曰潁川從我是曰元勳無忘父城實起王業文考
屬天地草昧造化權輿拯彼橫流匡茲頽運賴英賢盡
力文武同心翼贊大功克隆帝業而被堅執銳櫛風沐
雨永言疇昔良用憮然至若功成名遂建國剖符予惟
休也其有致死王事妻子無歸者朕甚傷之凡是從先
王向夏州發夏州從來見在及薨亡者並量賜錢帛稱
朕意焉是月陳武帝薨兄子蒨立是謂文帝八月己亥

改天王稱皇帝追尊文王爲帝大赦改元壬子以大將
軍安城公憲爲益州總管癸丑增御正四人位上大夫
九月乙卯以大將軍天水公廣爲梁州總管辛未進封
輔城公邕爲魯國公安城公憲爲齊國公秦郡公直爲
衛國公正平公招爲趙國公封皇弟儉爲譙國公純爲
陳國公盛爲越國公達爲代國公通爲冀國公迥爲滕
國公進封天水公廣爲蔡國公高陽公達奚武爲鄭國
公武陽公豆盧寧爲楚國公博陵公賀蘭祥爲涼國公
寧蜀公尉遲迥爲蜀國公化政公宇文貴爲許國公陳
留公楊忠爲隋國公昌平公尉遲綱爲吳國公武威公

王雄爲庸國公邑各萬戶冬十月甲午以柱國吳國公尉遲綱爲涇州總管是月齊文宣帝薨于殷嗣立以柱國蜀國公尉遲迥爲秦州總管

二年春正月癸丑朔大會羣臣於紫極殿始用百戲焉三月辛酉重陽閣成會羣公列將卿大夫及突厥使者於芳林園賜錢帛各有差夏四月帝因食遇毒庚子大漸詔曰人生天地之間稟五常之氣天地有窮已五常有推移人安得長在是以生而有死者物理之必然處必然之理脩短之間何足多恨朕雖不德性好典墳披覽聖賢餘論未嘗不以此自曉今乃命也夫復何言諸

公及在朝卿大夫士軍中大小督將軍等並立勲效積有年載輔翼太祖成我周家今朕纘承大業處萬乘之上此乃上不負太祖下不負朕躬朕得啓手啓足從先帝於地下實無恨於心矣所可恨者朕享大位可謂四年矣不能使政化循理黎庶豐足九州未一二方猶梗顧此懷恨日用不暇唯冀仁兄冢宰洎朕先正先父公卿大臣等協和爲心勉力相勸勿忘太祖遺志提挈後人朕雖沒九泉形體不朽今大位虛曠社稷無主朕兒幼稚不堪當國魯國公邕朕之介弟寬仁大度海內共聞能弘我周家必此子也夫人貴有始終公等事太祖

輔朕躬可謂有始矣若克念世道艱難輔臣以至天下者可謂有終矣哀死事生人臣大節公等思念此言令萬代稱歎朕稟生儉素非能力行菲薄每寢大布之被服大帛之衣凡是器用皆無雕刻身終之日豈容違棄此好喪事所須務從儉約歛以時服勿使有金玉之飾若以禮不可闕皆令用瓦小歛訖七日哭文武百官各權辟衰麻且以素服從事葬日選擇不毛之地因地勢爲墳勿封勿樹且厚葬傷生聖人所誠朕旣服膺聖人之教安敢違之凡百官司勿異朕此意四方州鎮使到各令三日哭哭訖悉權辟凶服還以素服從事待大例

除非有呼召各按部自守不得輒奔赴闕庭禮有通塞隨時之義葬訖內外悉除服從吉三年之內勿禁婚娶飲食一令如平常也時事殷猥病困心亂止能及此如其事有不盡准此以類爲斷死而近思古人有之朕今忍死書此懷抱其詔卽帝口授也辛丑崩於延壽殿時年二十七諡曰明皇帝廟稱世宗五月辛未葬於昭陵帝寬明仁厚敦睦九族有君人之量幼而好學博覽羣書善屬文詞彩溫麗及卽位集公卿已下有文學者八十餘人於麟趾殿刊校經史又摭採衆書自義農以來訖於魏末叙爲世譜凡五百卷云所著文章十卷

史臣曰世宗寬仁遠度叡哲博聞處代邸之尊實文昭
之長豹姿已變龍德猶潛而百辟傾心萬方注意及乎
迎宣黜賀入纂太宗而禮貌功臣敦睦九族率由恭儉
崇尚文儒疊疊焉其有君人之德者矣始則權臣專制
政出私門終乃鳩毒潏加享年不永惜哉

周書卷四終

周書卷五

帝紀第五

唐令狐德棻等撰

皇明朝列大夫國子監祭酒臣蕭雲舉
承德郎右春坊右中允管司業享臣李騰芳等奉
勅重較刊
皇明朝列大夫國子監祭酒臣吳十元
承德郎司業仍加俸一級臣黃錦等奉
旨重修

武帝上

高祖武皇帝諱邕字禰羅突太祖第四子也母曰叱奴
太后大統九年生於同州有神光照室幼而孝敬聰敏
有器質太祖異之曰成吾志者必此兒也年十二封輔
城郡公孝閔帝踐祚拜大將軍出鎮同州世宗卽位遷

在國授蒲州諸軍事蒲州刺史武成元年入爲大司空
治御正進封魯國公領宗師甚爲世宗所親愛朝廷大
事多共參議性沉深有遠識非因顧問終不輒言世宗
每歎曰夫人不言言必有中武成二年夏四月世宗崩
遺詔傳帝位於高祖高祖固讓百官勸進乃從之壬寅
卽皇帝位大赦天下冬十二月改作露門應門是歲齊
常山王高演廢其主殷而自立是爲孝昭帝

保定元年春正月戊申詔曰寒暑亟周奄及徂歲改元
命始國之典章朕祗承寶圖宜遵故實可改武成二年
爲保定元年嘉號旣新惠澤宣布文武百官各增四級

以大象宰晉國公護爲都督中外諸軍事命五府總於
天官庚戌祠圓丘壬子祠方丘甲寅祠感生帝於南郊
乙卯祠太社辛酉突厥遣使獻其方物戊辰詔曰履端
開物寔資元后代終成務諒惟宰棟故周文公以上聖
之智翼彼姬周爰作六典用光七百自茲厥後代失其
緒俾巍巍之化歷于祀而莫傳郁郁之風終百王而永
隆我太祖文皇帝稟純和之氣挺天縱之英德配乾元
功侔造化故能捨末世之異風頤隆周之獻典誕述百
官厥用允集所謂乾綱獨攬而重構豈帝王洪範而已哉
朕入嗣大寶思揚休烈今可班斯禮於太祖廟庭已巳

祠太廟班太祖所述六官焉癸酉吐谷渾高昌並遣使
獻方物甲戌詔先經兵戎官年六十已上及民七十已
上節級板授官乙亥親耕籍田丙子大射於正武殿賜
百官各有差二月已卯遣大使巡察天下於洮陽置洮
州甲午朝日於東郊乙未突厥宕昌並遣使獻方物丙
午省峯巒去百戲弘農上言九尾狐見三月丙寅改八
丁兵爲十二丁兵率歲一月役夏四月丙子朔日有食
之庚寅以少傅吳公尉遲綱爲大司空丁酉白蘭遣使
獻犀甲鐵鎧五月丙午封孝閔皇帝子康爲紀國公皇
子贊爲魯國公晉公護獲玉斗以獻戊辰突厥龜茲並

遣使獻方物六月乙酉遣治御正殷不害等使於陳秋
七月戊申詔曰亢旱歷時嘉苗殄悴豈獄犴失理刑罰
乖衷歟其所在見囚死以下一歲刑以上各降本罪一
等百鞭以下悉原免之更鑄錢文曰布泉以一當五與
五銖並行巴西追封皇伯父顥爲邵國公以晉公子江
陵公會爲後次伯父連爲杞國公以章武孝公子永昌
公亮爲後第三伯父洛生爲莒國公以晉公子崇業公
至爲後又追封武邑公震爲宋國公以世宗子實爲後
金襲封已巳癸惑入典鬼犯積尸九月甲辰南寧州遣
使獻滇馬及蜀鎧乙巳客星見於翼冬十月甲戌日有

蝕之戊寅熒惑犯太微上將合焉十一月乙巳以大將軍衛國公直爲雍州牧陳遣使來聘進封柱國廣武公實熾爲鄧國公丁巳狩於岐陽是月齊孝昭帝薨弟長廣王湛代立是爲武成帝十二月壬午至自岐陽是歲追封皇族祖仲爲虞國公

二年春正月壬寅初於蒲州開河渠同州開龍首渠以廣灌溉丁未以陳主弟頊爲柱國送還江南閏月己丑詔柱國以下帥都督以上母妻授太夫人夫人郡君縣君各有差癸巳太白入昴己亥柱國大司馬涼國公賀蘭祥薨洛州民周共妖言惑衆假署將相事發伏誅二

月壬寅熒惑犯太微上相癸丑以久不雨降有罪人京城三十里內禁酒梁主蕭督薨以大將軍蔡國公廣爲秦州總管三月壬午熒惑犯左執法夏四月甲辰禁屠宰旱故也丁巳南陽獻三足烏湖州上言見二白鹿從三角獸而行巳未於伏流城置和州癸亥詔曰比以寇難猶梗九州未一文武之官立功效者雖錫以茅土而未及租賦諸柱國等勲德隆重宜有優崇各准別制邑戶聽寄食他縣五月庚午以山南衆瑞益集太赦天下百官及軍人普汎二級南陽宛縣三足烏所集免今年役及租賦之半壬辰以柱國隋國公楊忠爲大司空吳

國公尉遲綱爲陝州總管六月己亥以柱國蜀國公尉遲迥爲大司馬邵國公會爲蒲州總管分山南荊州安州襄州江陵爲四州總管秋七月己巳封開府賀拔緯爲霍國公乙亥太白犯輿鬼九月戊辰朔日有蝕之陳遣使來聘冬十月戊戌詔曰樹之元首君臨海內本乎宣明教化亭毒黔黎豈唯尊貴其身侈富其位是以唐堯踈葛之衣麤糲之食尚臨汾陽而永歎登姑射而興想况無聖人之德而嗜欲過之何以克厭衆心處于尊位朕甚惡焉今巨寇未平軍戎費廣百姓空虛與誰爲足凡是供朕衣服飲食四時所須爰及宮內調度朕今

手自減削縱不得頓行古人之道直曰全無庶幾凡爾百司安得不思省約勗朕不逮者哉辛亥帝御大武殿大射公卿列將皆會戊午講武於少陵原分南寧州置恭州十一月丁卯以大將軍衛國公直大將軍趙國公招金爲柱國又以招爲益州總管壬午熒惑犯歲星於危南十二月益州獻赤烏

三年春正月辛未改光遷國爲遷州乙酉太保梁國公侯莫陳崇賜死壬辰於乞銀城置銀州二月庚子初頒新律辛丑詔魏大統九年以前都督以上身亡而子孫未齒叙者節級授官渭州獻三足烏辛酉詔曰二儀創

開玄象著明三才已備曆數昭列故書稱欽若敬授易
序治曆明時此先代一定之典百王不易之務伏惟太
祖文皇帝敬順昊天憂勞庶政曆序六家以陰陽爲首
洎予小子弗克遵行惟斯不安夕惕若厲自頃朝廷權
輿事多倉卒乖和爽序違失先志致風雨愆時疾厲屢
起嘉生不遂萬物不長朕甚傷之自今舉大事行大政
非軍機急速皆宜依月令以順天心三月乙丑朔日有
蝕之凶子宕昌遣使獻生猛獸二詔放之南山乙酉益
州獻三足鳥夏四月乙未以柱國鄭國公達奚武爲太
保大將軍韓果爲柱國己亥帝御正武殿錄囚徒癸卯

大雩癸丑有牛足生於背戊午幸太學以太傅燕國公
于謹爲三老而問道焉初禁天下報讐犯者以殺人論
壬戌詔百官及民庶上封事極言得失五月甲子朔避
正寢不受朝早故也甲戌兩秋七月戊辰行幸原州庚
午陳遣使來聘丁丑幸津門問百年賜以錢帛又賜高
年板職各有差降死罪一等八月丁未改作露寢九月
甲子自原州登隴山熒惑犯太微上將丙戌幸同州戊
子詔柱國楊忠率騎一萬與突厥伐齊己丑蒲州獻嘉
禾異畝同穎初令世襲州郡縣者改爲五等爵州封伯
郡封子縣封男冬十月壬辰熒惑犯左執法乙巳以開

府杞國公亮爲梁州總管庚戌陳遣使來聘十有二月
辛卯至自同州遣太保鄭國公達奚武率騎三萬出平
陽以應楊忠是月有人生子男而陰在背後如尾兩足
指如獸爪有大生子腰以後分爲二身兩尾六足
四年春正月庚申楊忠破齊長城至晉陽而還二月庚
寅朔日有蝕之甲午熒惑犯房右驂三月己未熒惑又
犯房右驂庚辰初令百官執笏夏四月癸卯以柱國鄧
公竇熾爲大宗伯五月壬戌封世宗長子賢爲畢國公
丁卯突厥遣使獻方物癸酉以大將軍安武公李穆爲
柱國丁亥改禮部爲司宗大司禮爲禮部大司樂爲樂

部六月庚寅改御伯爲納言秋七月戊午栗特遣使獻
方物戊寅焉耆遣使獻名馬八月丁亥朔日有蝕之詔
在國楊忠率師與突厥東伐至北河而還戊子以柱國
齊公憲爲雍州牧許國公宇文貴爲大司徒九月丁巳
以柱國衛國公直爲大司空封開府李虎爲唐國公若
干鳳爲徐國公陳遣使來聘是月以皇世母閻氏自齊
至大赦天下閏月己亥以大將軍韋孝寬大將軍長孫
儉並爲柱國冬十月癸亥以大將軍陸通大將軍宇文
盛蔡國公廣並爲柱國甲子詔大將軍大象宰晉國公
護率軍伐齊帝於太廟庭授以斧鉞於是護總大軍出

潼關大將軍權景宣率山南諸軍出豫州少師楊樹出
枳關丁卯幸沙苑勞師癸酉還宮十一月甲午在國蜀
國公尉遲迥率師圍洛陽在國齊國公憲營於邛山晉
公護次於陝州十二月權景宣攻齊豫州刺史王士良
以州降壬戌齊師渡河晨至洛陽諸軍驚散尉遲迥率
麾下數十騎并敵得却至夜引還在國庸國公王雄力
戰死之遂班師楊樹於枳關戰沒權景宣亦棄豫州而
還

五年春正月甲申朔廢朝以庸國公王雄死王事故也
辛卯白虹貫日庚子令荊州安州江陵等總管並隸襄

州總管府以在國大司空衛國公直爲襄州總管甲辰
太白熒惑歲星合於婁乙巳吐谷渾遣使獻方物以庸
國公王雄世子開府謙爲在國二月辛酉詔陳國公純
在國許國公宇文貴神武公竇毅南安公楊薦等如突
厥途女甲子郢州獲綠毛龜丙寅以在國安武公李穆
爲大司空綏德公陸通爲大司空寇壬申行幸岐州三月
戊子柱國楚國公豆盧寧薨夏四月齊武成禪位於其
太子緯自稱太上皇帝五月丙戌以皇族父興爲大將
軍襲虞國公封己亥詔左右武伯各置中大夫一人六
月庚申彗星出三台入文昌犯上將後經紫宮西垣入

危漸長一丈餘指室壁後百餘日稍短長二尺五寸在
虛危滅辛未詔曰江陵人年六十五以上爲官奴婢者
已令放免其公私奴婢有年至七十以外者所在官司
宜贖爲庶人秋七月辛巳朔日有蝕之庚寅行幸秦州
降死罪以下辛丑遣大使巡察天下八月丙子至自秦
州九月乙巳益州獻三足烏冬十月辛亥改函谷關城
爲通洛防十一月庚辰岐州上言一角獸見甲午吐谷
渾遣使獻方物丁未陳遣使來聘

天和元年春正月己卯日有蝕之辛巳露寢成幸之令
羣臣賦古詩京邑耆老並預會焉頒賜各有差矣未大

赦改元百官普加四級己亥親耕籍田丁未於宕昌置
宕州以柱國昌寧公長孫儉爲陝州總管遣小載師杜
果使於陳二月戊申以開府中山公訓爲蒲州總管戊
辰詔三公已下各舉所知庚午日鬪光遂微日裏烏見
三月丙午祠南郊夏四月己酉益州獻三足烏辛亥雩
甲子日有交暈白虹貫之是月陳文帝薨子伯宗嗣立
五月庚辰帝御正武殿集羣臣親講禮記吐谷渾龍洞
王莫昌率戶內附以其地爲扶州甲午詔曰道德交喪
禮義嗣興褒四始於一言美三千於爲敬是以在上不
驕處滿不溢富貴所以長守邦國於焉又安故能承天

靜地和民敬鬼明並日月道錯四時朕雖庸昧有志前
古甲子乙卯禮云不樂萑弘表昆吾之念杜篋有揚解
之文自世道喪亂禮儀紊毀此典茫然已墜於地昔周
王受命請聞顓頊廟有戒盈之器室爲復禮之銘矧伊
未學而能忘此宜依是日省事停樂庶知爲君之難爲
臣不易貽之後昆殷鑒斯在六月丙午以大將軍抱罕
公辛威爲柱國秋七月戊寅築武功郿斜谷武都留谷
津坑諸城以置軍人壬午詔諸胄子入學但束脩於師
不勞釋奠釋奠者學成之祭自今卽爲恒式八月己未
詔諸有三年之喪或負土成墳或寢苦骨立一志一行

可稱揚者仰本部官司隨事言上當加弔勉以厲薄俗
九月乙亥信州蠻冉令賢向五子王反詔開府陸騰討
平之冬十月乙卯太白晝見經天甲子初造山雲舞以
備六代之樂十一月丙戌行幸武功等新城十二月庚
申還官

二年春正月癸酉朔日有蝕之己亥親耕籍田三月癸
酉改武遊園爲道會苑丁亥初立郊丘壇壝制度夏四
月乙巳省東南諸州以潁州歸州澠州均州入唐州油
州入純州鴻州入淮州洞州入湖州睢州入襄州憲州
入昌州以大將軍陳國公純爲柱國五月壬申突厥吐

谷渾安息並遣使獻方物丁丑進封柱國安武公李穆
爲申國公巳丑歲星與熒惑合於井六月辛亥尊所生
叱奴氏爲皇太后甲子月入畢閏月庚午地震戊寅陳
湘州刺史李皎率衆來附遣襄州總管衛國公直率柱
國綏國公陸通大將軍田弘權景宣元定等將兵援之
因而南伐壬辰以大將軍譙國公儉爲柱國丁酉歲星
太白合於柳戌戌襄州上言慶雲見秋七月辛丑梁州
上言鳳凰集於楓樹羣鳥列侍以萬數甲辰立露門學
置生七十二人庚戌太白犯軒轅壬子以大傅燕國公
于謹爲雍州牧九月衛國公直等與陳將淳于量吳明

徹戰於沌口王師失利元定以步騎數千先度遂沒江
南冬十月辛卯日出入時有黑氣一大如盃在日中甲
午又加一焉經六日乃滅十一月戊戌朔日有蝕之癸
丑太保許國公宇文貴薨

三年春正月辛丑祠南郊二月丁卯幸武功丁亥還官
三月癸卯皇后阿史那氏至自突厥甲辰大赦天下亡
官失爵並聽復舊丁未大會百寮及四方賓客於路寢
賜衣馬錢帛各有差甲寅以柱國陳國公純爲秦州總
管蔡國公廣爲陝州總管戊午太傅柱國燕國公于謹
薨巳未太白犯井北軒第一星夏四月辛巳以太保鄭

國公達奚武爲太傅大司馬蜀國公尉遲迥爲太保在
國齊國公憲爲大司馬太白入輿鬼犯積尸五月庚戌
祠太廟庚申行幸醴泉宮六月甲戌有星孛於東井北
行六月至輿鬼乃滅秋七月壬寅在國隋國公楊忠薨
戊午至自醴泉宮己未客星見房漸東行入天市犯營
室至奎四十餘日乃滅八月乙丑韓國公元羅薨齊請
和親遣使來聘詔軍司馬陸逞兵部尹公正報聘焉癸
酉帝御大德殿集百僚及沙門道士等親講禮記九月
庚戌太白與鎮星合於角冬十月癸亥祠太廟丙戌太
白入氏丁亥上親率六軍講武於城南京邑觀者輿馬

瀰漫數十里諸蕃使咸在焉十一月壬辰朔日有蝕之
甲辰行幸岐陽壬子遣開府崔彥穆小賓部元暉使於
齊甲寅陳安成王瑱廢其王伯宗而自立是爲宣帝十
二月丁丑至自岐陽是月齊武成帝薨

四年春正月辛卯朔廢朝以齊武成薨故也遣司會河
陽公李綸等會葬於齊仍弔賻焉二月癸亥以柱國昌
寧公長孫儉爲夏州總管戊辰帝御大德殿集百僚道
士沙門等討論釋老義歲星逆行掩太微上將庚午有
流星大如斗出左攝提流至天津滅後有聲如雷夏四
月乙巳齊遣使來聘五月己丑帝制象經成集百僚講

說封魏廣平公子元謙爲韓國公以紹魏後庚戌行幸醴泉宮丁巳柱國吳國公尉遲綱薨六月築原州及涇州東城秋七月辛亥至自醴泉宮丁巳突厥遣使獻馬八月庚辰盜殺孔城防主以其地入齊九月辛卯遣柱國齊國公憲率衆於宜陽築崇德等城冬十一月辛亥柱國昌寧公長孫儉薨十二月壬午罷隴州

五年春二月己巳邵惠公顯孫肅自齊來歸改邵國公會爲譚國公封肅爲邵國公三月辛卯進封柱國韋孝寬爲鄆國公甲辰初令宿衛官任關外者將家累入京不樂者解宿衛夏四月甲寅以柱國宇文盛爲大宗伯

行幸醴泉宮省帥都督官丙寅遣大使巡天下以陳國公純爲陝州總管六月壬辰封開府梁睿爲蔣國公庚子降宥罪人并免逋租懸調等以皇女生故也七月州獻白兔乙卯至自醴泉宮辛巳以柱國譙國公儉爲益州總管九月己卯太白歲星合於亢冬十月辛巳朔日有蝕之丙戌太白鎮星合於氐丁酉太傅鄭國公達奚武薨十一月乙丑追封章武孝公導爲幽國公以蔡國併於幽丁卯柱國幽國公廣薨十二月癸巳大將軍鄭恪率師平越嶲置西寧州是冬齊將斛律明月寇邊於汾北築城自華谷至於龍門

六年春正月己酉朔廢朝以露門未成故也詔柱國齊國公憲率師禦斛律明月丁卯以大將軍張掖公王傑譚國公會鴈門公田弘魏國公李暉等並爲柱國二月己丑夜有蒼雲廣三尺許經天自戌加辰三月己酉齊國公憲自龍門度河斛律明月退保華谷憲攻拔其新築五城夏四月戊寅朔日有蝕之己卯熒惑犯輿鬼辛卯信州蠻渠冉祖喜冉龍驤舉兵反遣大將軍趙闇率師討平之甲午以柱國燕國公于寔爲涼州總管大將軍杞國公亮爲秦州總管庚子以大將軍滎陽公司馬消難爲柱國陳國公純鴈門公田弘率師取齊宜陽等

九城以夫將軍武安公侯莫陳瓊太安公閻慶神武公寶毅南陽公叱羅協平高公侯伏侯龍恩並爲柱國封開府斛斯徵爲岐國公右宮伯長孫覽爲薛國公五月癸卯遣納言鄭詡使於陳丙寅以大將軍唐國公李虎中山公訓杞國公亮上庸公陸騰安義公宇文丘北平公寇紹許國公宇文善健爲公高琳鄭國公達奚震隴東公楊纂常山公于翼並爲柱國六月乙未以大將軍太原公王東爲柱國是月齊將段孝先攻陷汾州秋七月乙丑以大將軍越國公盛爲柱國八月癸未鎮星歲星太白合於氐九月庚申月在婁蝕之旣光不復癸酉

省掖庭四夷樂後宮羅綺工人五百餘人冬十月壬午翼國公通薨乙未遣右武伯谷會琨御正蔡斌使於齊壬寅上親率六軍講武於城南十一月壬子以大將軍梁國公侯莫陳芮大將軍李意並爲柱國丙辰齊遣使來聘丁巳行幸散關十二月己丑還宮是冬牛大疫死者十六七

建德元年春正月戊午帝幸玄都觀親御法座講說公卿道俗論難事畢還宮降死罪及流罪一等其五歲刑已下金宥之二月癸酉遣大將軍昌城公孫深使於突厥司宗李祭小賓部賀遂禮使於齊乙酉柱國安義公

宇文丘薨三月癸卯朔日有蝕之齊遣使來聘丙辰誅

大冢宰晉國公護護子柱國譚國公會會弟大將軍甚

國公至崇業公靜并柱國侯伏侯龍恩龍恩弟大將軍

萬壽大將軍劉勇等大赦改元罷中外府癸亥以大傅

蜀國公尉遲迴爲太師柱國鄧國公竇熾爲太傅大司

空中國公李穆爲太保齊國公憲爲大冢宰衛國公直

爲大司徒趙國公招爲大司空柱國枹罕公辛威爲大

司寇綏德公陸通爲大司馬詔曰民亦勞止則星動於

天作事不時則石言於國故知爲政欲靜靜在寧民爲

治欲安安在息役頃興造無度徵發不已加以頻歲師

旅農畝廢業去秋災蝗年穀不登民有散亡家空杼軸
朕每旦恭已夕惕兢懷自今正調以外無妄徵發庶時
殷俗阜稱朕意焉夏四月甲戌以代國公達滕國公道
並爲柱國詔荊州安州江陵等總管停隸襄州己卯以
柱國張掖公王傑爲涇州總管魏國公李暉爲梁州總
管詔公卿以下各舉所知遣工部代公達小禮部辛彥
之使於齊丙戌詔百官軍民上封事極言得失丁亥詔
斷四方非常貢獻庚寅追尊畧陽公爲孝閔皇帝癸巳
立魯國公贇爲皇太子大赦天下百官各加封級五月
封衛國公直長子賓爲莒國公紹管莊公洛生後壬戌

帝以大旱集百官於庭詔之曰盛農之節亢陽不雨氣
序愆度蓋不徒然豈朕德薄刑賞乖申歟將公卿大臣
或非其人歟宜盡直言無得有隱公卿各引咎自責其
夜澍雨六月庚子改置宿衛官員秋七月辛丑陳遣使
來聘丙午辰星太白合於東井己酉月犯心中星九月
庚子朔日有蝕之庚申扶風掘地得玉盃以獻冬十月
庚午詔江陵所獲俘虜充官口者悉免爲民辛未遣小
匠師楊勰齊馭唐則使於陳柱國大司馬綏德公陸通
薨十一月丙午壬午親率六軍講武城南庚戌行幸堯橋
集京城以東諸軍都督以上頒賜有差乙卯還宮壬戌

以大司空趙國公招爲大司馬乙未月犯心中星十二
月壬申行幸斜谷集京城以西諸軍都督已上頒賜有
差丙戌還宮已丑帝御正武殿親錄囚徒至夜而罷庚
寅幸道會苑以上善殿壯麗遂焚之

二年春正月辛丑祠南郊乙巳以柱國鴈門公田弘爲
大司空大將軍徐國公若千鳳爲柱國庚戌復置帥都
督官乙卯祠太廟閏月己巳陳遣使來聘二月辛亥白
虹貫日甲寅詔皇太子贊撫巡西土壬戌遣司會侯莫
陳凱太子宫尹鄭謨使於齊熒惑犯輿鬼入積尸省雍
州內八郡併入京兆馮翊扶風咸陽等郡三月己卯皇

太子於岐州獲二白鹿以獻詔答曰在德不在瑞癸巳
省六府諸司中大夫以下官府置四司以下大夫爲之
官長上士貳之夏四月己亥祠太廟丙辰增改東宮官
員五月丁卯熒惑犯右執法丁丑以柱國周昌公侯莫
陳瓊爲大宗伯滎陽公司馬消難爲大司寇上庸公陸
騰爲大司空六月庚子省六府員外諸官皆爲丞甲辰
月犯心中星壬子皇孫行生文武官普加一階大選諸
軍將帥丙辰帝御露寢集諸軍將勗以戎事庚申詔諸
軍旌旗皆畫以猛獸鷲鳥之象秋七月己巳祠太廟自
春末不雨至於是月壬申集百寮於大德殿帝責躬罪

已間以治政得失戊子兩八月丙午改三夫人爲三妃
關內大蝗九月乙丑陳遣使來聘癸酉太白犯右執法
戊寅以柱國鄭國公達奚震爲金州總管詔曰政在節
財禮雅寧儉而頃者婚嫁競爲奢靡牢羞之費罄竭資
財甚乖典訓之理有司宜加宣勅使咸遵禮制壬午納
皇太子妃楊氏冬十月癸卯齊遣使來聘甲辰六代樂
成帝御崇信殿集百官以觀之十一月辛巳帝親率大
軍講武於城東癸未集諸軍都督以上五十人於道會
苑大射帝親臨射官大備軍容十二月癸巳集羣臣及
沙門道士等帝升高座辨釋三教先後以儒教爲先道

教爲次佛教爲後以大將軍樂川公赫連達爲柱國詔
曰尊年尚齒列代弘規序舊酬勞哲王明範朕嗣承弘
業君臨萬邦驅此兆庶真諸仁壽軍民之間年多耆耄
眷言衰暮宜有優崇可頒授老職使榮霑邑里戊午聽
訟於正武殿自旦及夜繼之以燭

三年春正月壬戌朝羣臣於露門冊柱國齊國公憲衛
國公直趙國公招譙國公儉陳國公純越國公盛代國
公達滕國公道金進爵爲王己巳祠太廟庚午突厥遣
使獻馬癸酉詔自今已後男年十五女年十三已上爰
及鰥寡所在軍民以時嫁娶務從節儉勿爲財幣稽留

乙亥親耕籍田丙子初服短衣享二十四軍營將以下
試以軍旅之法縱酒盡歡詔以往歲年穀不登民多乏
絕令公私道俗凡有貯積粟麥者皆准口聽留以外盡
糴二月壬辰朔日有食之丁酉紀國公康舉國公賢鄴
國公貞宋國公實漢國公贊秦國公贊曹國公允金進
爵爲王丙午令六府各舉賢良清正之人癸丑柱國許
國公宇文善有罪免乙卯行幸雲陽宮丙辰詔曰民生
而靜純懿之性本均感物而遷嗜欲之情斯起雖復雲
鳥殊世文質異時莫不限以隄防示之禁令朕君臨萬
寓覆養黎元思振頽綱納之軌式比因人有犯與衆棄

之所在羣官有憊過者感聽首露莫不輕重畢陳纖毫
無隱斯則風行草偃從化無違導德齊禮庶幾可致但
上失其道有自來矣凌夷之弊反本無由宜加蕩滌與
民更始可大赦天下庚申皇太后不豫三月辛酉至自
雲陽宮癸酉皇太后叱奴氏崩帝居倚廬朝夕共一溢
米羣臣表請累旬乃止詔皇太子贊總釐庶政夏四月
乙卯齊遣使弔贈會葬丁巳有星孛於東北紫宮垣長
七尺五月庚申葬文宣皇后於永固陵帝祖既至陵所
辛酉詔曰齊斬之情經籍彝訓近代沿革遂亡斯禮伏
奉遺令既葬便除攀慕几筵情實未忍三年之喪達於

天子古今無易之道王者之所常行但時有未諸不得
全制軍國務重庶自聽朝縑麻之節苦廬之禮率遵前
典以申罔極百寮以下宜依遺令公卿上表固請俯就
權制過葬卽吉帝不許引古禮答之羣臣乃止於是遂
申三年之制五服之內亦令依禮初置太子諫議員四
人文學十人皇弟皇子友員各二人學士六人丁卯荆
州獻白鳥戊辰詔故晉國公護及諸子並追復先封改
葬加諡丙子初斷佛道二教經像悉毀罷沙門道士並
令還民并禁諸淫祀禮典所不載者盡除之六月丁未
集諸軍將教以戰陣之法壬子更鑄五行大布錢以一

當十與布泉錢並行戊午詔曰至道弘深混成無際體
包空有理極幽玄但岐路旣分派源逾遠淳離朴散形
氣斯乖遂使三墨八儒朱紫交競九流七畧異說相騰
道隱小成其來舊矣不有會歸爭驅靡息今可立通道
觀聖哲微言先賢典訓金科玉篆秘蹟玄文所以濟養
黎元扶成教義者並宜弘闡一以貫之俾夫翫培塿者
識嵩岱之崇崑守磧礫者悟渤澥之泓澄不亦可乎秋
七月庚申行幸雲陽宮乙酉衛王直在京師舉兵反欲
突入蕭章門司武尉遲運等拒守直敗率百餘騎遁走
京師連雨三旬是日霽戊子至自雲陽宮八月辛卯擒

直於荊州免爲庶人乙未詔自建德元年八月以前犯罪未被推糾於後事發失官爵者並聽復舊丙申行幸雲陽官九月庚申幸同州戊辰以柱國太宗伯周昌公侯莫陳瓊爲秦州總管冬十月丙申御正楊尚希禮部盧愷使於陳戊戌雍州獻倉烏庚子詔蒲州民遭饑乏絕者令向鄆城以西及荊州管內就食甲寅行幸蒲州乙卯曲赦蒲州見囚大辟以下丙辰行幸同州始州民王鞅擁衆反大將軍鄭恪討平之十一月戊午以柱國大司空上庸公陸騰爲涇州總管子闡遣使獻名馬已巳大閱於城東甲戌至自同州十二月戊子大會衛官

及軍人以上賜錢帛各有差辛卯月掩太白詔荆襄安延夏五州總管內有能率其從軍者授官各有差其貧下戶給復三年丙申改諸軍軍士並爲侍官丁酉利州上言騶虞見癸卯集諸軍講武於臨臯澤涼州比年地震壞城郭地裂涌泉出

皇明朝列大夫國子監祭酒臣蕭雲舉
 承德郎司業仍加奉一級臣黃 錦等奉
 旨重修
 初重較刊
 皇明朝列大夫國子監祭酒臣蕭雲舉
 承德郎司業仍加奉一級臣黃 錦等奉
 旨重修
 武帝下
 建德四年春正月戊辰以柱國袍罕公辛威為寧州總
 管太原公王康為襄州總管初置營軍器監壬申詔曰
 今陽和布氣品物資始敬授民時義兼敦勸詩不云乎
 弗躬弗親庶民弗信刺史守令宜親勸農百司分番躬
 弗躬弗親庶民弗信刺史守令宜親勸農百司分番躬

周書卷五終

周書卷六

帝紀第六

唐令狐德棻等撰

皇明朝列大夫國子監祭酒臣蕭雲舉
 承德郎司業仍加奉一級臣黃 錦等奉
 旨重修
 初重較刊
 皇明朝列大夫國子監祭酒臣蕭雲舉
 承德郎司業仍加奉一級臣黃 錦等奉
 旨重修
 武帝下
 建德四年春正月戊辰以柱國袍罕公辛威為寧州總
 管太原公王康為襄州總管初置營軍器監壬申詔曰
 今陽和布氣品物資始敬授民時義兼敦勸詩不云乎
 弗躬弗親庶民弗信刺史守令宜親勸農百司分番躬
 弗躬弗親庶民弗信刺史守令宜親勸農百司分番躬

自率導事非機要並停至秋鰥寡孤獨不能自存者所
在量加賑卹遺租懸調兵役殘功並宜蠲免癸酉行幸
同州二月丙戌朔日有蝕之辛卯改置宿衛官員己酉
在國廣德公李意有罪免三月丙辰遣小司寇淮南公
元衡納言伊嘉謀使於齊郡縣各省主簿一人丙寅至
自同州甲戌以在國趙王招爲雍州牧夏四月甲午在
國燕國公于寔有罪免丁酉初令上書者並爲表於皇
太子以下稱啓六月詔東南道四總管內自去年以來
新附之戶給復三年秋七月丙辰行幸雲陽宮己未禁
五行大布錢不得出入關布泉錢聽入而不聽出了卯

至自雲陽宮甲戌陳遣使來聘丙子召大將軍以上於
大德殿帝曰太祖神武膺運創造王基兵威所臨有征
無戰唯彼僞齊猶懷跋扈雖復戎車屢駕而大勳未集
朕以寡昧纂承鴻緒往以政出權宰無所措懷自親覽
萬機便圖東討惡衣菲食繕甲治兵數年已來戰備稍
足而僞主昏虐恣行無道伐暴除亂斯實其時今欲數
道出兵水陸兼進北拒太行之險東扼黎陽之險若攻
拔河陰充豫則馳檄可定然彼未銳銳享士以待其至但
得一戰則破之必矣王公以爲何如羣臣咸稱善丁丑
詔曰高氏因時放命據有汾漳擅假名器歷年永久朕

以亭毒爲心遵養時晦遂敦聘好務息黎元而彼懷惡不悛尋事侵軼背言負信竊邑藏姦往者軍下宜陽蒙由彼始兵興汾曲事非我先此獲俘囚禮送相繼彼所拘執曾無一反加以淫刑妄逞毒賦繁興齊魯軫矜悴之哀幽并啓來蘇之望旣禍盈惡稔衆叛親離不有一戎何以大定今白藏在辰涼風戒節厲兵詰暴時事惟宜朕當親御六師龔行天罰庶憑祖宗之靈潛資將士之力風馳九有電掃八紘可分命衆軍指期進發以柱國陳王純爲前一軍總管滎陽公司馬消難爲前二軍總管鄭國公達奚震爲前三軍總管越王盛爲後一軍

總管周昌公侯莫陳瓊爲後二軍總管趙王招爲後三軍總管齊王憲率衆二萬趣黎陽隋國公楊堅廣寧侯薛廻舟師三萬自渭入河柱國梁國公侯莫陳芮率衆一萬守太行道申國公李穆帥衆三萬守河陽道常山公于翼帥衆二萬出陳汝壬午上親率六軍衆六萬直指河陰八月癸卯入于齊境禁伐樹踐苗稼犯者以軍法從事丁未上親率諸軍攻河陰大城拔之進攻子城未克上有疾九月辛酉夜班師水軍焚舟而退齊王憲及于翼李穆等所在克捷降拔三十餘城皆棄而不守唯以王藥城要害令儀同三司韓正守之正尋以城降

齊戊寅至自東伐已卯以華州刺史畢王賢爲荊州總管冬十月戊子初置上柱國上大將軍官改開府儀同三司爲開府儀同大將軍儀同三司爲儀同大將軍又置上開府上儀同官甲午行幸同州閏月齊將尉相貴寇大寧延州總管王慶擊走之以柱國齊王憲蜀國公尉遲迥爲上柱國柱國代王達爲益州總管大司寇榮陽公司馬消難爲梁州總管詔諸畿郡各舉賢良十二月巳亥改置司內官員十二月辛亥朔日有食之庚午至自同州丙子陳遣使來聘是歲岐寧二州民饑開倉賑給

五年春正月癸未行幸同州辛卯行幸河東涑川集關中河東諸軍校獵甲午還同州丁酉詔曰朕克已思治而風化未弘永言前古載懷夕惕可分遣大使周省四方察訟聽誣問民卹隱其獄犴無章侵漁黎庶隨事究驗條錄以聞若政績有施治綱克舉及行宣主華道著丘園並須檢審依名騰奏其鰥寡孤獨寔可哀矜亦宜賑給務使周贍廢布泉錢戊申初令鑄錢者絞其從者遠配爲民二月辛酉遣皇太子贊巡撫西土仍討吐谷渾戎事節度並宜隨機專決三月庚子月犯東井第一星壬寅至自同州文宣皇后服再朞戊申祥夏四月乙

卯行幸同州開府清河公宇文神舉攻拔齊陸渾等五
城五月壬辰至自同州六月戊申朔日有食之辛亥祠
大廟丙辰利州總管紀王康有罪賜死丁巳行幸雲陽
宮月掩心後星庚午熒惑入輿鬼秋七月乙未京師旱
八月戊申皇太子伐吐谷渾至伏俟城而還乙卯至自
雲陽宮乙丑陳遣使來聘九月丁丑大醮於正武殿以
祈東伐冬十月帝謂羣臣曰朕去歲屬有疹疾遂不得
克平逋寇前入賊境備見敵情觀彼行師殆同兒戲又
聞其朝政昏亂政由羣小百姓嗷然朝不謀夕天與不
取恐貽後悔若復同往年出軍河外直爲撫背未扼其

喉然晉州本高歡所起之地鎮攝要重今往攻之彼必
來援吾嚴軍以待擊之必克然後乘破竹之勢鼓行而
東足以窮其窟穴混同文軌諸將多不願行帝曰幾者
事之微不可失矣若有沮吾軍者朕當以軍法裁之已
酉帝總戎東伐以越王盛爲右一軍總管杞國公亮爲
右二軍總管隋國公楊堅爲右三軍總管譙王儉爲左
一軍總管大將軍竇泰爲左二軍總管廣化公丘崇爲
左三軍總管齊王憲陳王純爲前軍庚戌熒惑犯太微
上將戊午歲星犯太陵癸亥帝至晉州遣齊王憲率精
騎二萬守雀鼠谷陳王純步騎二萬守千里徑鄭國公

達奚震步騎一萬守統軍川大將軍韓明步騎五千守
齊子橫馬氏公尹昇步騎五千守鍾鼓鎮涼城公辛韶
步騎五千守蒲津關柱國趙王招步騎一萬自華谷攻
齊汾州諸城柱國宇文盛步騎一萬守汾水關遣內史
王誼監六軍攻晉州城帝屯於汾曲齊王憲攻洪洞永
安二城並拔之是夜虹見於晉州城上首向南尾入紫
微宮長十餘丈帝每自自汾曲赴城下親督戰城中惶
窘庚午齊行臺左丞侯子欽出降壬申齊晉州刺史崔
景嵩守城北面夜密遣使送款上開府王軌率衆應之
未明登城鼓噪齊衆潰遂克晉州擒其城主特進開府

海昌王尉相貴俘甲士八千人送關中甲戌以上開府
梁士彥爲晉州刺史加授大將軍留精兵一萬以鎮之
又遣諸軍徇齊諸城鎮並相次降款十一月己卯齊主
自并州率衆來援帝以其兵新集且避之乃詔諸軍班
師遣齊王憲爲後拒是日齊主至晉州憲不與戰引軍
度汾齊主遂圍晉州晝夜攻之齊王憲屯諸軍於涑水
爲晉州聲援河東地震癸巳至自東伐獻俘於太廟甲
午詔曰僞齊違信背約惡稔禍盈是以親總六師問罪
汾晉兵威所及莫不摧殄賊衆危惶烏栖自固暨元戎
反旆方來聚結遊魂境首尚敢赳赳朕今更率諸軍應

機除剪丙申放齊諸城鎮降人還丁酉帝發京師壬寅
度河與諸軍合十二月戊申次於晉州初齊攻晉州恐
王師卒至於城南穿塹自喬山屬於汾水庚戌帝帥諸
軍八萬人置陣東西二十餘里帝乘常御馬從數人巡
陣處分所至輒呼王帥姓名以慰勉之將士感見知之
恩各思自厲將戰有司請換馬帝曰朕獨乘良馬何所
之齊主亦於塹北列陣申後齊人填塹南引帝大喜勒
諸軍擊之齊人便退齊主與其麾下數十騎走還并州
齊衆大潰軍資甲仗數百里間委棄山積辛亥帝幸晉
州仍率諸軍追齊主諸將固請還師帝曰縱敵患生卿
等若疑朕將獨往諸將不敢言甲寅齊主追其丞相高
阿那肱守高壁帝麾軍直進那肱望風退散丙辰師次
介休齊將韓建業舉城降以爲上柱國封郟國公丁巳
大軍次并州齊主留其從兄安德王延宗守并州自將
輕騎走鄴是日詔曰此下缺

人寄喉膺之重棟梁骨鯁翦爲仇讐

狐趙緒餘降成阜棘民不見德唯虐是聞朕懷茲漏網
置之度外正欲各靜封疆共紓民瘼故也爾之主相曾
不是思欲構屬階反貽其梗我之幸土咸求傳刃帷幄
獻兼翊之謀爪牙奮干戈之勇羸糧坐甲若赴私讐是
以一鼓而定晉州再舉而摧連醜僞丞相高阿那肱驅
逼餘燼竊據高壁僞定南王韓建業作守介休規相抗
擬聊示兵威應時崩潰那肱則單馬宵遁建業則面縛
軍和爾之逃卒所知兒也若其懷遠以德則爾難以德
綏處隣以義則爾難以義服且天與不取道家所忌攻

昧侮亡兵之上術朕今親馭羣雄長驅宇內六軍舒旆
萬隊啓行勢與雷電爭威氣逐風雲齊舉王師所次已
達近郊望歲之民室家相慶來蘇之后思副厥誠僞主
若妙盡人謀深達天命率羊道左銜璧轅門當惠以焚
櫬之恩待以列侯之禮僞將相王公已下衣冠士民之
族如有深識事宜建功立効官榮爵賞各有加隆若下
愚不移守迷莫改則委之執憲以正刑書嗟爾庶士胡
寧自棄或我之將卒逃彼逆朝無問貴賤皆從蕩滌善
求多福無貽後悔璽書所至咸使聞知自是齊之將帥
降者相繼封其特進開府賀拔伏恩爲郃國公其餘官

爵各有差戊午高延宗僭卽僞位改年德昌己未軍次并州庚申延宗擁兵四萬出城抗拒帝率諸軍合戰齊人退帝乘勝逐北率千餘騎入東門詔諸軍繞城置陣至夜延宗率其衆排陣而前城中軍却人相蹂踐大爲延宗所敗死傷畧盡齊人欲閉門以闔下積尸扉不得闔帝從數騎崎嶇危險僅得出門至明率諸軍更戰大破之擒延宗并州平壬戌詔曰昔天厭水運龍戰于野兩京圯隔四紀于茲朕垂拱巖廊君臨宇縣相邠民於海內混楚弓於天下一物失所有若推溝方欲德綏未服義征不諛僞主高緯放命燕齊怠慢典刑倣擾天紀

加以背惠怒鄰棄信忘義朕應天從物伐罪弔民一鼓而蕩平陽再舉而摧勅敵僞署王公相繼道左高緯智窮數屈逃竄草間僞安德王高延宗擾攘之間遂竊名號與僞齊昌王莫多婁敬顯等收合餘燼背城抗敵王威旣振魚潰鳥離破竹更難建旆非易延宗衆散解甲軍門根本旣傾枝葉自實幽青海岱折簡而來冀北河南傳檄可定八紘共貫六合同風方當偃伯靈臺休牛桃塞無疆之慶非獨在余漢皇約法除其苛政姬王輕典刑彼新邦思覃惠澤被之率土新舊臣民皆從蕩滌可大赦天下高緯及王公以下若釋然歸順咸許自新

諸亡入僞朝亦從寬宥官榮次序依例無失其齊僞制
令卽宜削除鄒魯摺紳幽并騎士一介可稱並宜銓錄
百年去殺雖或難希暮月有成庶幾可勉丙寅出齊宮
中金銀寶器珠翠麗服及宮女二千人班賜將士以柱
國趙王招陳王純越王盛杞國公亮梁國公侯莫陳芮
庸國公王謙北平公寇紹鄭國公達奚震並爲上柱國
封齊王憲子安城郡公質爲河間王大將軍廣化公丘
崇爲潞國公神水公姬願爲原國公廣業公尉遲運爲
盧國公諸有功者封授各有差矣西帝率六軍趣鄴以
上柱國陳王純爲并州總管

六年春正月乙亥齊主傳位於其太子恒改年承光自
號爲太上皇壬辰帝至鄴齊王先於城外掘塹豎柵癸
巳帝率諸軍圍之齊人拒守諸軍奮擊大破之遂平鄴
齊主先送其母并妻子於青州及城陷乃率數十騎走
青州遣大將軍尉遲勤率二千騎追之是戰也於陣獲
其齊昌王莫多婁敬顯帝責之曰汝有死罪者三前從
并走鄴携妾棄母是不孝外爲僞主戮力內實通啓於
朕是不忠送欵之後猶持兩端是不信如此用懷不死
何待遂斬之是日西方有聲如雷者一甲午帝入鄴城
齊任城王湝先在冀州齊主至河遣其侍中斛律孝卿

送傳國璽禪位於潛孝卿未達被執送鄴詔去年夫蔡班宣未及之處皆從赦例封齊開府洛州刺史獨狐永業爲應國公丙申以上柱國越王盛爲相州總管己亥詔曰自晉州大陣至于平鄴身殞戰場者其子卽授笑本官尉遲勤擒齊王及其太子恒於青州庚子詔曰偽齊之末姦佞擅權濫罰淫刑動挂羅網僞右丞相咸陽王故斛律明月僞侍中特進開府故崔季舒等七人或功高獲罪或直言見誅朕兵以義動翦除凶暴表間封墓事切下車宜追贈諡并宓措其見存子孫各隨陰敘錄家口田宅沒官者並還之辛丑詔曰僞齊叛渙竊有

漳濱世縱淫風事窮彫飾或穿池運石馬山學海或層臺累構槩日凌雲以暴亂之心極奢侈之事有一於此未或弗亡朕菲食薄衣以弘風教追念生民之費尚想力役之勞方當易茲弊俗率歸節儉其東山南園及三臺可並毀撤瓦木諸物凡入用者盡賜下民山園之田各還本主二月丙午論定諸軍功勳置酒於齊太極殿會軍士以上班賜有差丁未齊王至帝降自阼階以賓主之禮相見高潛在冀州擁兵未下遣上柱國齊王憲與柱國隋公楊堅率軍討平之齊定州刺史范陽王高紹義叛入突厥齊諸行臺州鎮悉降關東平合州五十

五郡一百六十二縣三百八十五戶三百三十萬二千五百二十八口二千萬六千六百八十六乃於河陽幽青南充豫徐北朔定並置總管府相并二總管各置官及六府官癸丑詔曰無侮孰獨事顯前書哀彼矜人惠流往訓僞齊未政昏虐寔繁災甚滔天毒流比屋無罪無辜係虜三軍之手不飲不食僵仆九達之門朕爲民父母職養黎人念甚泣辜誠深罪已除其苛政事屬改張宜加寬宥兼行振卹自僞武平三年以來河南諸州之民僞齊被掠爲奴婢者不問官私並宜放免其住在淮南者亦卽聽還願往淮北者可隨便安置其有癯殘

孤老饑餒絕食不能自存者仰刺史守令及親民長司躬自檢校無親屬者所在給其衣食務使存濟乙卯帝自鄴還京丙辰以柱國隋公楊堅爲定州總管三月壬午詔山東諸州各舉明經幹治者二人若奇才異術卓爾不羣者弗拘多少夏四月乙巳至自東伐列齊主於前其王公等並從車輦旗幟及器物以次陳於其後大駕布六軍備凱樂獻俘於太廟京邑觀者皆稱萬歲戊申封齊主爲溫國公庚戌大會羣臣及諸蕃客於露寢乙卯廢蒲陝涇寧四州總管己巳祠太廟詔曰東夏旣平王道初被齊氏弊政餘風未殄朕劬勞萬機念存康

濟恐清淨之志未形四海下民疾苦不能上達寢興軫
慮用切於懷宜分遣使人巡方撫慰觀風省俗宣揚治
道有司明立條科務在弘益五月丁丑以柱國譙王儉
爲大冢宰庚辰以上柱國杞國公亮爲大司徒鄭國公
達奚震爲大宗伯梁國公侯莫陳芮爲大司馬柱國應
國公獨孤永業爲大司寇鄖國公韋孝寬爲大司空辛
巳大醮於正武殿以報功也巳丑祠方丘詔曰朕欽承
丕緒寢興夙畏惡衣菲食貴昭儉約上棟下宇土階茅
屋猶恐居之者逸作之者勞詎可廣厦高堂肆其嗜欲
往者冢臣專任制度有違正殿別寢事窮壯麗非直雕

瑋峻宇深戒前王而締構弘敞有踰清廟不軌不物何
以示後兼東夏初平民未見德率先海內宜自朕始其
露寢會義崇信舍仁雲和思齊諸殿等農隙之時悉可
毀撤雕斲之物並賜貧民繕造之宜務從卑朴癸巳行
幸雲陽宮戊戌詔曰京師宮殿已從撤毀并鄴二所華
侈過度誠復作之非我豈容因而弗革諸堂殿壯麗並
宜除蕩薨宇雜物分賜窮民三農之隙別漸營構止蔽
風雨務在卑狹庚子陳遣使來聘是月青城門無故自
崩六月丁未至自雲陽宮辛亥御正武殿錄囚徒癸亥
於河州鷄鳴防置旭州甘松防置芳州廣川防置弘州

甲子帝東巡丁卯詔曰同姓百世婚姻不通蓋惟重別
周道然也而娶妻買妾有納母氏之族雖曰異宗猶爲
混雜自今以後悉不得娶母同姓以爲妾其已定未成
者卽令改聘秋七月己卯封齊王憲第四子廣都公負
爲莒國公紹莒莊公洛生後癸未應州獻芝草丙戌行
幸洛州己丑詔山東諸州舉有才者上縣六人中縣五
人下縣四人赴行在所共論治政得失戊戌以上柱國
庸公王謙爲益州總管八月壬寅議定權衡度量頒於
天下其不依新式者悉追停詔曰以刑止刑世輕世重
罪不及嗣皆有定科雜役之徒獨異常憲一從罪配百

世不免罰旣無窮刑何以措道有沿革宜從寬典凡諸
雜戶悉放爲民配雜之科因之永削甲子鄭州獻九尾
狐皮肉銷盡骨體猶具帝曰瑞應之來必昭有德若使
五品時敘四海和平家識孝慈人知禮讓乃能致此今
無其時恐非實錄乃命焚之九月壬申以柱國鄧國公
竇熾中國公李穆並爲上柱國戊寅初令民庶已上唯
聽衣綢綿綢絲布圓綾紗絹綃葛布等九種餘悉停斷
朝祭之服不拘此例甲申絳州獻白雀壬辰詔東土諸
州儒生明一經已上並舉送州郡以禮發遣癸卯封上
大將軍上黃公王軌爲郊國公吐谷渾遣使獻方物冬

十月戊申行幸鄴宮戊午改葬德皇帝於冀州帝服總
哭於太極殿百官素服哭是月誅溫國公高緯十一月
庚午百濟遣使獻方物壬申封皇子克爲道王允爲蔡
王癸酉陳將吳明徹侵呂梁徐州總管梁士彥出軍與
戰不利退守徐州遣上大將軍鄭國公王軌率師討之
是月稽胡反遣齊王憲率軍討平之詔自永熙三年七
月已來去年十月已前東土之民被抄畧在化內爲奴
婢者及平江陵之後良人沒爲奴婢者並宜放免所在
附籍一同民伍若舊主人猶須共居聽留爲部曲及客
女詔曰正位於中有聖通典質文相革損益不同五帝

則四星之象三王制六宮之數劉曹已降等列彌繁選
擇過於生民命秩方於庶職椒房丹地有衆如雲本由
嗜欲之情非關風化之義朕運當澆季思復古始無容
廣集子女屯聚宮掖弘贊後庭事從約簡可置妃二人
世婦三人御妻三人自茲以外悉宜減省己亥晦日有
蝕之初行刑書要制持杖羣彊盜一匹以上不持杖羣
彊盜五匹以上監臨主掌自盜二十匹以上小盜及詐
僞請官物三十匹以上正長隱五戶及十丁以上隱地
三項以上者至死刑書所不載者自依律科十二月戊
午吐谷渾遣使獻方物己未東壽陽土人反率衆五千

襲并州城刺史東平公宇文神舉破平之庚申行幸并州官移并州軍人四萬戶於關中丙寅以柱國滕王道爲河陽總管丁卯以柱國隋國公楊堅爲南兗州總管上柱國申國公李穆爲并州總管戊辰廢并州官及六府是月北營州刺史高寶寧據州反

宣政元年春正月癸酉吐谷渾僞趙王他婁屯來降壬午行幸鄴宮分相州廣平郡置洺州清河郡置貝州黎陽郡置黎州汲郡置衛州分定州常山郡置恒州分并州上黨郡置潞州辛卯行幸懷州癸巳幸洛州詔於懷州置宮二月甲辰柱國大冢宰譙王儉薨丁巳帝至自

東巡乙丑以上柱國越王盛爲大冢宰陳王純爲雍州牧三月戊辰於蒲州置宮廢同州及長春二宮壬申突厥遣使獻方物甲戌初服常冠以皂紗爲之加簪而不施纓導其制若今之折角巾也上大將軍郊國公王軌破陳師於呂梁擒其將吳明徹等俘斬三萬餘人丁亥詔柱國故豆盧寧征江南武陵南平等郡所有民庶爲人奴婢者悉依江陵放免壬辰改元夏四月壬子初令人遺父母喪者聽終制庚申突厥入寇幽州殺畧吏民議將討之五月己丑帝總戎北伐遣柱國原公姬願東平公宇文神舉等率軍五道俱入發關中公私驢馬悉從

軍癸巳帝不豫止于雲陽宮丙申詔停諸軍事六月丁酉帝疾甚還京其夜崩於乘輿時年三十六遺詔曰人肖形天地稟質五常脩短之期莫非命也朕君臨宇縣十有九年未能使百姓安樂刑措罔用所以昧旦求衣分宵忘寢昔魏室將季海內分崩太祖扶危翼傾肇開王業燕趙榛蕪久竊名號朕上述先志下順民心遂與王公將帥共平東夏雖復妖氛蕩定而民勞未康每一念此如臨冰谷將欲包舉六合混同文軌今邁疾大漸氣力稍微有志不申以此歎息天下事重萬機不易王公以下爰及庶僚宜輔導太子副朕遺意令上不負太祖

祖下無失爲臣朕雖瞑目九泉無所復恨朕平生居處每存菲薄非直以訓子孫亦乃本心所好喪事資用須使儉而合禮墓而不墳自古通典隨吉卽葬葬訖公除四方士庶各三日哭妃嬪以下無子者悉放還家謚曰武皇帝廟稱高祖已未葬於孝陵帝沉毅有智謀初以晉公護專權常自晦迹人莫測其深淺及誅護之後始親萬機尅已勵精聽覽不怠用法嚴整多所罪殺號令懇惻唯屬意於政羣下畏服莫不肅然性旣明察少於恩惠凡布懷立行皆欲踰越古人身衣布袍寢布被無金寶之飾諸宮殿華綺者皆撤毀之改爲土階數尺不

施櫨拱其雕文刻鏤錦繡纂組一皆禁斷後宮嬪御不
過十餘人勞謙接下自彊不息以海內未康銳情教習
至於校兵閱武步行山谷履涉勤苦皆人所不堪平齊
之役見軍士有跣行者帝親脫靴以賜之每宴會將士
必自執杯勸酒或手付賜物至於征伐之處躬在行陣
性又果決能斷大事故能得上卒死力以弱制強破齊
之後遂欲窮兵極武平突厥定江南一二年間必使天
下一統此其志也

史臣曰自東西否隔二國爭疆戎馬生郊十戈日用兵
連禍結力敵勢均疆場之事一彼一此高祖續業未親
萬機慮遠謀深以蒙養正及英威電發朝政惟新內難
既除外畧方始乃苦心焦思克已勵精勞役爲士卒之
先居處同匹夫之儉脩富民之政務疆兵之術乘讐人
之有釁順大道而推亡五年之間大勲斯集摠祖宗之
宿憤拯東夏之阡危盛矣哉其有成功者也若使翌日
之瘳無爽經營之志獲申廣武窮兵雖見譏於良史雄
圖遠畧足方駕於前王者歟

周書卷六終

周書卷七

帝紀第七

唐令狐德棻等撰

皇明朝列大夫國子監祭酒臣蕭雲舉

承德郎右春坊右中允管司業事臣李騰芳等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

旨重修

宣帝

宣皇帝諱贇字乾伯高祖長子也母曰李太后武成元年生於同州保定元年五月丙午封魯國公建德元年四月癸巳高祖親告廟冠於阼階立為皇太子詔皇太子巡撫西土文宣皇后崩高祖諒闇詔太子總朝政五

旬而罷高祖每巡幸四方太子常留監國五年二月又
詔皇太子巡西土因討吐谷渾宣政元年六月丁酉高
祖崩戊戌皇太子即皇帝位尊皇后爲皇太后癸丑歲
星熒惑太白合於東井甲子誅上柱國齊王憲封開府
于智爲齊國公閏月乙亥詔山東流民新復業者及突
厥侵掠家口破亡不能存濟者並給復一年立妃楊氏
爲皇后辛巳以上柱國趙王招爲太師陳王純爲太傅
柱國代王達滕王道盧國公尉遲運薛國公長孫覽並
爲上柱國進封柱國平陽郡公王誼爲揚國公是月幽
州人盧昌期據范陽反詔柱國東平公宇文神舉師衆

討平之秋七月辛丑月犯心前星乙巳祠太廟丙午祠
圓丘戊申祠方丘庚戌以小宗伯岐國公斛斯徵爲大
宗伯丙辰熒惑太白合於七星己未太白犯軒轅大星
壬戌以柱國南兗州總管隋公楊堅爲上柱國大司馬
癸亥尊所生李氏爲帝太后八月丙寅夕月於西郊長
安萬年二縣民居在京城者給復三年壬申行幸同州
遣大使巡察諸州詔制九條宣下州郡一曰決獄科罪
皆准律文二曰母族絕服外者聽婚三曰以杖決罰悉
令依法四曰郡縣當境賊盜不擒獲者並仰錄奏五曰
孝子順孫義夫節婦表其門閭才堪任用者即宜申薦

六曰或昔經驅使名位未達或沉淪蓬華文武可施宜
金採訪具以名奏七曰偽齊七品以上已敕收用八品
以下爰及流外若欲入仕皆聽預選降二等授官八曰
州舉高才博學者爲秀才郡舉經明行脩者爲孝廉上
州上郡歲一人下州下郡三歲一人九曰年七十以上
儀式授官鰥寡困乏不能自存者並加稟恤以大司徒
杞國公亮爲安州總管上柱國薛國公長孫覽爲大司
徒柱國楊國公王誼爲大司空庚辰太白入太微丙戌
以柱國永昌公椿爲大司寇九月丁酉熒惑入太微以
柱國宇文盛張掖公王僕抱罕公辛威鄖國公韋孝寬

並爲上柱國庚戌封白王弟元爲荆王詔諸應拜者皆以
三拜成禮汾州稽胡帥劉受邏千舉兵反詔上柱國越
王盛爲行軍元帥率衆討平之庚申熒惑犯左執法冬
十月癸酉至自同州以大司空楊國公王誼爲襄州總
管戊子百濟遣使獻方物十一月己亥講武於道會死
帝親擲甲冑是月突厥寇邊圍酒泉殺掠吏民十二月
甲子以柱國畢王賢爲大司空癸未熒惑入氏仍留經
一月己丑以上柱國河陽總管滕王道爲行軍元帥率
衆伐陳免京師見徒並令從軍

大象元年春正月癸巳受朝於露門帝服通天冠絳紗

袍羣臣皆服漢魏衣冠大赦改元大成初置四輔官以
上柱國大冢宰越王盛爲大前疑相州總管蜀國公尉
遲迥爲大右弼申國公李穆爲大左輔大司馬隋國公
楊堅爲大後丞癸卯封皇子衍爲魯王甲辰東巡狩丙
午日有背以柱國常山公于翼爲大司徒辛亥以柱國
許國公宇文善爲大宗伯癸丑日又背戊午行幸洛陽
立魯王衍爲皇太子二月癸亥詔曰河洛之地世稱朝
市上則於天陰陽所會下紀於地職貢路均聖人以萬
物阜安乃建王國時經五代世歷千祀規摹弘遠邑居
壯麗自魏氏失馭城闕爲墟君子有戀舊之風小人深

懷土之思我太祖受命鄴鎬胥宇嶠函蕩定四方有懷
光宅高祖神功聖畧混一區宇往巡東夏省方觀俗布
政此宮遂移氣序朕以眇身祗承寶祚庶幾聿脩之志
敢忘燕翼之心一昨駐蹕金墉備嘗遊覽百王制度基
趾尚存今若因脩爲功易立宜命邦事脩復舊都奢儉
取文質之間功役依子來之義北瞻河內咫尺非遙前
謂經營今宜停罷於是發山東諸州兵增一月功爲四
十五日役起洛陽官常役四萬人以迄于晏駕并移相
州六府於洛陽稱東京六府殺柱國徐州總管鄒國公
王軌停南討諸軍以趙王招女爲千金公主嫁於突厥

戊辰以上在國郎國公韋孝寬爲徐州總管乙亥行幸
鄴丙子初命授總管刺史及行兵者加持節餘悉罷之
辛巳詔曰有聖大寶寔是惟重器玄天表命人事與能幽
顯同謀確乎不易域中之大寶懸定於杳冥天下爲公
蓋不避於內舉我大周感蒼昊之精受河洛之錫武功
文德光格區宇創業垂統永光無窮朕以寡薄祗承鴻
緒上賴先朝得一之迹下藉羣后不貳之心職貢與雲
雨俱通憲章共光華並巨圓首方足咸登仁壽思隆國
本用弘天曆皇太子衍地居上嗣正統所歸遠憑積德
之休允叶無疆之祚帝王之量未肅而成天祿之期不

謀已至朕今傳位於衍乃睠四海深合謳歌之望俾予
一人高蹈風塵之表萬方兆庶知朕意焉可大赦天下
改大成元年爲大象元年帝於是自稱天元皇帝所居
稱天臺冕有二十四旒室服旗鼓皆以二十四爲節內
史御正皆置上大夫皇帝衍稱正陽宮置納言御正諸
衛等官皆准天臺尊皇太后爲天元皇太后封內史上
大夫鄭譯爲沛國公癸未日初出及將入時其中僉有
烏色大如雞卵經四日滅戊子以上在國大前疑越王
盛爲大保大右弼蜀公尉遲迥爲大前疑代王達爲大
右弼辛卯詔徙鄴城石經於洛陽又詔曰洛陽舊都今

既脩復凡是元遷之戶並聽還洛州此外諸民欲往者亦任其意河陽幽相豫亳青徐七總管受東京六府處分三月壬寅以上柱國薛國公長孫覽爲涇州總管庚申至自東巡大陳軍伍帝親擐甲胄入自青門皇帝衍備法駕從入百官迎於青門外其時驟雨儀衛失容辛酉封趙王招第二子貫爲永康縣王夏四月壬戌朔有司奏言日蝕不視事過時不食乃臨軒立妃朱氏爲天元帝后癸亥以柱國畢王賢爲上柱國己巳祠太廟壬午大醮於正武殿戊子太白歲星辰星合於東井五月辛亥以洛州襄國郡爲趙國以齊州濟南郡爲陳國以

豐州武當安富二郡爲越國以潞州上黨郡爲代國以荊州新野郡爲滕國邑各一萬戶令趙王招陳王純越王盛代王達滕王道金之國癸丑有流星大如斗出太微落落如遺火是月遣使簡視京兆及諸州士民之女充選後宮突厥寇并州六月丁卯有流星大如雞子出氏西北流長一丈八月中己巳月犯房北頭第二星乙酉有流星大如斗出營室流入東壁是月咸陽有池水變爲血發山東諸州民脩長城秋七月庚寅以太司空畢王賢爲雍州牧大後丞隨國公楊堅爲大前疑柱國榮陽公司馬清雖爲大後丞壬辰焚惑掩房北頭第一

星丙申納大後丞司馬消難女爲正陽宮皇后尊天元
帝太后李氏爲天皇太后壬子改天元帝后朱氏爲天
皇后立妃元氏爲天右皇后妃陳氏爲天左皇后八月
庚申行幸同州壬申還宮甲戌以天左皇后父大將軍
陳山提天右皇后父開府元晟並爲上柱國山提封鄜
國公晟封翼國公開府楊雄爲邦國公乙弗寔戴國公
初高祖作刑書要制用法嚴重及帝卽位以海內初平
恐物情未附乃除之至是大醮於正武殿告天而行焉
辛巳熒惑犯南斗第五星壬午以上柱國雍州牧畢王
賢爲太師上柱國郇國公韓建業爲大左輔是月所在

有蟻羣鬪各方四五尺死者什八九九月巳酉太白入
南斗乙卯以鄆王貞爲大冢宰上柱國鄖國公章孝寬
爲行軍元帥率行軍總管杞國公亮郟國公梁士彥以
伐陳遣御正杜杲禮部薛舒使於陳冬十月壬戌歲星
犯軒轅大星是日帝幸道會苑夫醮以高祖武皇帝配
醮訖論議於行殿是歲初復佛像及天尊像至是帝與
二像俱南面而坐大陳雜戲令京城士民縱觀乙酉熒
惑鎮星合於虛是月相州人段德舉謀反伏誅十一月
乙未幸温湯戊戌行幸同州壬寅還宮己酉有星大如
斗出張東南流光明燭地丁巳初鑄永通萬國錢以一

當十與五行大布並行是月韋孝寬拔壽陽杞國公亮拔黃城梁士彥拔廣陵陳人退走於是江北盡平十二月戊午以災異屢見帝御路寢見百官詔曰穹昊在上聰明自下吉凶由人妖不自作朕以寡德君臨區寓大道未行小信非福始於秋季及此玄冬幽顯殷勤屢貽深戒至有金入南斗木犯軒轅熒惑干房又與土合流星照夜東南而下然則南斗主於爵祿軒轅爲於後宮房曰明堂布政所也火土則憂孽之兆流星乃兵凶之驗豈其官人失序女謁尚行行政事乖方憂患將至何其昭著若斯之甚上瞻俯察朕實懼焉將避正寢齋居克

念惡衣減膳去飾撤懸披不諱之誠開直言之路欲使刑不濫及賞弗踰等選舉以才宮闈脩德宜宣諸內外庶盡弼諧允叶民心用銷天譴於是舍仗衛往天興宮百官上表勸復寢膳許之甲子還宮御正武殿集百官及宮人內外命婦大列妓樂又縱胡人乞寒用水澆沃爲戲樂乙丑行幸洛陽帝親御驛馬日行三百里四皇后及文武侍衛數百人並乘驛以從仍令四后方駕齊驅或有先後便加譴責人馬頓仆相屬己卯還宮二年春正月丁亥帝受朝于道會苑癸巳祀太廟乙巳造二辰晷日月之象以置左右戊申雨雪雪止又雨細

黃土移時乃息乙卯詔江左諸州新附民給復二十年
初稅入市者人一錢二月丁巳帝幸露門學行釋奠之
禮戊午突厥遣使獻方物且逆千金公主乙丑改制詔
爲天制詔敕爲天敕壬午尊天元皇太后爲天元上皇
太后天皇太后李氏曰天元聖皇太后癸未立天元皇
后楊氏爲天元太皇后天皇后朱氏爲天大皇后天右
皇后元氏爲天右大皇后天左皇后陳氏爲天左大皇
后正陽宮皇后直稱皇后是日洛陽有禿鷲鳥集於新
營太極殿前榮州有黑龍見與赤龍鬪於汴水之側黑
龍死三月丁亥賜百官及民大酺詔曰盛德之後是稱

不絕功施於民義昭祀典孔子德惟藏往道實生知以
大聖之才屬千古之運載弘儒業式叙彝倫至如幽贊
天人之理裁成禮樂之務故以作範百王垂風萬葉朕
欽承寶曆服膺教義眷言洙泗懷道滋深且褒成啓號
雖彰故實旌崇聖績猶有闕如可追封爲鄒國公邑數
准舊并立後承襲別於京師置廟以時祭享戊子行軍
總管杞國公亮舉兵反襲行軍元帥鄭國公韋孝寬於
豫州亮不勝孝寬獲而殺之辛卯以永昌公椿爲杞國
公紹簡公連後行幸同州增候正前驅戒道爲三百六
十重自應門至於赤岸澤數十里間幡旗相蔽鼓樂俱

作又令武賁持鉞馬上稱警蹕以至於同州乙未改同
州宮爲天成宮庚子至自同州詔天臺侍衛之官皆著
五色及紅紫綠衣以雜色爲緣名曰品色衣有大事與
公服間服之壬寅詔內外命婦皆執笏其拜宗廟及天
臺皆俛伏甲辰初置天中大皇后立天左大皇后陳氏
爲天中大皇后立妃尉遲氏爲天左大皇后夏四月乙
丑有星大如斗出天厨流入紫宮抵鈞陳乃滅己巳祀
太廟己卯詔曰朕以寡薄昧於治方不能使天地休和
陰陽調序自春涉夏甘澤未豐旣軫西郊之歎將虧南
畝之業興言夕惕無忘鑿昧良由德化未敷政刑多僻

萬方有罪責在朕躬思覃寬惠被之率土見囚死罪並
降從流流罪從徒五歲刑已下悉皆原宥其及叛惡逆
不道及常赦所不免者不在降例壬午幸中山祈雨至
咸陽宮雨降甲申還宮令京城士女於衢巷作音樂以
迎候五月己丑以上在國大前疑隋國公楊堅爲揚州
總管甲午夜帝備法駕幸天興宮乙未帝不豫還宮詔
隋國公堅入侍疾甲辰有星大如三斗出太微端門流
入翼聲若風鼓幡旗丁未追趙陳越代滕五王入朝己
酉大漸御正下大夫劉昉與內史上大夫鄭譯矯制以
隋國公堅受遺輔政是日帝崩於天德殿時年二十二

諡曰宣皇帝七月丙申葬定陵帝之在東宮也高祖處其不堪承嗣遇之甚嚴朝見進止與諸臣無異雖隆寒盛暑亦不得休息性既嗜酒高祖遂禁醪醴不許至東宮帝每有過輒加捶扑嘗謂之曰古來太子被廢者幾人餘兒豈不堪立耶於是遣東宮官屬錄帝言語動作每月奏聞帝憚高祖威嚴矯情脩飾以是過惡遂不外聞嗣位之初方逞其欲大行在殯曾無戚容卽閱視先帝宮人逼爲淫亂纔及踰年便恣聲樂采擇天下子女以充後宮好自矜夸飾非拒諫禪位之後彌復驕奢耽酗於後宮或旬日不出公卿近臣請事者皆附奄官奏

之所居宮殿帷帳皆飾以金玉珠寶光華炫燿極麗窮奢及營洛陽宮雖未成畢其規摹壯麗踰於漢魏遠矣唯自尊崇無所顧憚國典朝儀率情變改後宮位號莫能詳錄每對臣下自稱爲天以五色土塗所御天德殿各隨方色又於後宮與皇后等列坐用宗廟禮器罇彝珪瓚之屬以飲食焉又令羣臣朝天臺者皆致齋三日清身一日車旗章服侍於前王之數旣自比上帝不欲令人同已嘗自帶綬及冠通天冠加金附蟬願見侍臣武弁上有金蟬及王公有綬者並令去之又不聽人有高大之稱諸姓高者改爲姜九族稱高祖者爲長祖曾

祖爲次長祖官名凡稱上及大者改爲長有天者亦改之又令天下車皆以渾成木爲輪禁天下婦人皆不得施粉黛之飾唯官人得乘有輻車加粉黛焉西陽公温杞國公亮之子卽帝之從祖兄子也其妻尉遲氏有容色因入朝帝遂飲之以酒逼而淫之亮聞之懼誅乃反纔誅温卽追尉遲氏入宮初爲妃尋立爲皇后每召侍臣諭議唯欲興造變革未嘗言及治政其後遊戲無恒出入不飾羽儀仗衛晨出夜還或幸天興宮或遊道會苑陪侍之官皆不堪命散樂雜戲魚龍爛漫之伎常在目前好令京城少年爲婦人服飾入殿歌舞與後宮觀

之以爲喜樂擯斥近臣多所猜忌又悉於財畧無賜與恐羣臣規諫不得行已之志常遣左右密伺察之動止所爲莫不鈔錄小有乖違輒加其罪自公卿已下皆被楚撻其間誅戮黜免者不可勝言每笞捶人皆以百二十爲度名曰天杖宮人內職亦如之后妃嬪御雖被寵嬖亦多被杖背於是內外恐懼人不自安皆求苟免莫有固志重足累息以逮於終

史臣曰高祖識嗣子之非才顧宗祏之至重滯愛同於晉武則哲異於宋宣但欲威之以橫楚期之於懲肅義方之教豈若是乎卒使昏虐君臨姦回肆毒善無小而

必棄惡無大而弗為窮南山之簡未足書其過盡東觀
之筆不能記其罪然猶獲全首領及子而亡幸哉

周書卷七終

周書卷八

帝紀第八

唐令狐德棻等撰

皇明朝列大夫國子監祭酒臣蕭雲舉

勅重較刊 承德郎右春坊右中允管司業事臣李騰芳等奉

皇明朝列大夫國子監祭酒臣吳士元

勅重修 承德郎司業仍加俸一級臣黃 錦等奉

靜帝

靜皇帝諱衍後改為闡宣帝長子也母曰朱皇后建德
二年六月生於東宮大象元年正月癸卯封魯王戊午
立為皇太子二月辛巳宣帝於鄴宮傳位授帝居正陽
宮二年夏五月乙未宣帝寢疾詔帝入宿於露門學已

西宣帝崩帝入居天臺廢正陽宮大赦天下停洛陽宮
作庚戌上天元上皇太后尊號爲大皇太后天元聖皇
太后李氏爲太帝太后天元大皇后楊氏爲皇太后天
大皇后朱氏爲帝太后天中大皇后陳氏天右大皇
后元氏天左大皇后尉遲氏並出俗爲尼柱國漢王贊
爲上柱國右大丞相上柱國揚州總管隋國公楊堅爲
假黃鉞左大丞相柱國秦王贊爲上柱國帝居諒闇百
官總已以聽於左大丞相壬子以上柱國鄖國公韋孝
寬爲相州總管罷入十巾稅錢六月戊午以柱國許國公
宇文善神武公竇毅脩武公侯莫陳瓊大安公閻慶並

爲上柱國趙王招陳王純越王達代王盛滕王迥來朝
庚申復行佛道二教崔沙門道士精誠自守者簡令入
道辛酉以柱國杞國公椿燕國公干寔郃國公賀拔伏
恩並爲上柱國甲子相州總管尉遲迥舉兵不受代詔
發關中兵卽以孝寬爲行軍元帥率軍討之上柱國畢
王賢以謀執政被誅以上柱國秦王贊爲大冢宰杞國
公椿爲大司徒己巳詔南定北光衡巴四州民爲宇文
亮抑爲奴婢者並免爲民復其本業甲戌有赤氣起西
方漸東行遍天庚辰罷諸魚池及山澤公禁者與百姓
共之以柱國蔣國公梁睿爲益州總管秋七月甲申突

厥送齊范陽王高紹義庚寅申州刺史李慧起兵辛卯
月掩氐東南星甲午月掩南斗第六星庚子詔趙陳越
代勝五王入朝不趨劔履上殿榮州刺史邵國公宇文
胄舉兵遣大將軍清河公楊素討之青州總管尉遲勤
舉兵丁未隋公楊堅爲都督內外諸軍事己酉邳州總
管司馬消難舉兵以柱國楊國公王誼爲行軍元帥率
軍討之壬子歲星與太白合於張有流星大如斗出五
軍東北流光明燭地趙王招越王盛以謀執政被誅癸
丑封皇弟術爲鄴王術爲郢王是月豫州荊州襄州三
總管內諸蠻各率種落反焚燒村驛攻亂郡縣八月庚

申益州總管王謙與平兵不受代卽以梁睿爲行軍元帥
率軍討之丁卯封上柱國抱罕公辛威爲宿國公開府
怡昂爲鄴國公庚午韋孝寬破尉遲迴於鄴城迴自殺
相州平移相州於安陽其鄴城及邑居皆毀廢之分相
州陽平郡置毛州己亥黎郡置魏州丙子以漢王贊爲太
師上柱國并州總管申國公李穆爲太傅宋王實爲大
前疑秦王贊爲大右弼燕國公于寔爲大左輔己卯詔
曰朕祇承洪業二載於茲籍祖考之休憑宰輔之力經
天緯地四海晏如逆賊尉遲迴才質凡庸志懷姦慝因
緣戚屬位冠朝倫屬上天降禍先皇晏駕萬國深鼎湖

之痛四海窮遏密之悲獨幸天災欣然放命稱兵擁衆
便懷問鼎乃詔六師肅茲九伐而凶徒孔熾充原蔽野
諸將肆雷霆之威壯士縱貔貅之勢芟夷縈拂所在如
莽直指漳濱擒斬元惡羣醜喪魄咸集鼓下順高秋之
氣就上天之誅兩河妖孽一朝清蕩自朝及野喜抃相
趨昔上皇之時不言爲治聖人宰物有教而已未戢于
戈實深慚德思弘寬簡之政用副億兆之心可大赦天
下其共迴元謀執迷不悟及迴子姪逆人司馬消難王
謙等不在赦例庚辰司馬消難擁其衆以魯山甌山二
鎮奔陳遣大將軍宋安公元景山率衆追擊俘斬五百

餘人邳州平沙州氏帥開府楊永安聚衆應王謙遣大
將軍樂寧公達奚儒討之楊素破宇文冑於滎州斬冑
於石濟以上柱國神武公竇毅爲大司馬齊國公于智
爲大司空廢相青荆金晉梁六州總管九月甲申熒惑
與歲星合於翼丙戌廢河陽總管爲鎮隸洛州以小宗
伯竟陵公陽慧爲大宗伯壬辰廢皇后司馬氏爲庶人
甲午熒惑入太微戊戌以柱國楊國公王誼爲上柱國
辛丑分潼州管內新遂普合及瀘州管內瀘戎六州並
隸信州總管府巴西熒惑犯左執法庚戌以柱國常山
公于翼化政公宇文忻並爲上柱國進封翼爲任國公

忻爲英國公壬子丞相去左右之號隋公楊堅爲大丞相冬十月甲寅日有蝕之乙卯有流星大如五斗出張南流光明燭地壬戌陳王純以怨執政被誅大丞相隋國公楊堅加大冢宰五府總於天宮戊寅梁睿破王謙於劔南追斬之傳首京師益州平十一月甲辰達奚儒破楊永安於沙州沙州平乙巳歲星守太微丁未上柱國鄭國公韋孝寬薨十二月壬子以柱國邦國公楊雄爲爲上柱國癸丑熒惑入氐丁巳以柱國邦國公楊雄爲曾安公賀蘭暮邸國公梁士彥上大將軍新寧公叱列長文武鄉公崔弘度大將軍中山公宇文恩濮陽公宇

文述渭原公和于子任城公王景漁陽公楊銳上開府廣宗公李崇隴西公李詢益爲上柱國庚申以柱國楚國公豆盧勣爲上柱國癸亥詔曰詩稱不如同姓傳曰異姓爲後蓋明辨親疎皎然不雜太祖受命龍德猶潛錄表革代之文星垂除舊之象三分天下志扶魏室多所改作龔允上玄文武羣官賜姓者衆本殊國邑實乖胙土不歆非類異骨肉而共烝嘗不愛其親在行路而叙昭穆且神徵革姓本爲曆數有歸天命在人推讓終而弗獲故君臨區寓累世於茲不可仍遵謙挹之旨又行權宜之制諸改姓者悉宜復舊甲子大丞相隋國公

楊堅進爵爲王以十郡爲國辛未代王達勝王道彞以
謀執政被誅壬申以大將軍長寧公楊勇爲上柱國大
司馬小冢宰始平公元孝矩爲大司寇
大定元年春正月壬午詔曰朕以不天夙遭極罰光陰
遄速遽及此辰窮慕纏綿言增號絕踰祀革號憲章前
典可改大象三年爲大定元年乙酉歲星逆行守右執
法熒惑掩房北第一星丙戌詔曰帝王設官惟才是務
人臣報國薦賢爲重正歲已來屢有妖寇宰臣英莩咸
得清蕩逆亂之後兵車始揭遐邇勞役生民未康居寧
之徒致治者寡斯故上失其道以至於茲亦由下有幽

人未展其力今四海寧一八表無塵元輔執鈞垂風揚
化若使天下英傑盡升於朝銓衡陟降量才而處垂拱
無爲庶幾可至於是遣戎秩上開府以上職事下大夫
以上外官刺史以上各舉清平勤幹者三人被舉之人
居官三年有功過者所舉之人隨加賞罰以大司馬長
寧公楊勇爲洛州總管二月庚申大丞相隋王楊堅爲
相國總百揆更封十郡通前二十郡劔履上殿入朝不
趨贊拜不名備九錫之禮加重鉞遠遊冠相國印綠綬
綬位在諸王上又加冕十有二旒建天子旌旗出警入
蹕乘金根車駕六馬備五時副車置旄頭雲罕樂舞八

備設鍾簏宮懸王后王子爵命之號金依魏晉故事甲子隋王楊堅稱尊號帝遜于別宮隋氏奉帝爲介國公邑萬戶車服禮樂一如周制上書不爲表答表不稱詔有其文事竟不行開皇元年五月壬申崩時年九歲隋志也諡曰靜皇帝葬恭陵

史臣曰靜帝越自幼冲紹茲衰緒內相挾孫劉之詐戚藩無齊代之疆隋氏因之遂遷龜鼎雖復岷峨投袂翻成陵奪之威漳溢勤王無救宗周之殞嗚呼以太祖之克隆景業未踰二紀不祀忽諸斯蓋宣帝之餘殃非孺子之罪戾也

